

四庫全書

史部

欽定四庫全書

史部  
金史卷二  
三

詳校官國子監祭酒臣覺羅吉善

主事臣汪彥博覆勘

總校官舉人臣章維桓

校對官編修臣章宗瀛

謄錄監生臣吳映熙

欽定四庫全書

金史卷二

元中書右丞相總裁托克托等修

本紀第二

太祖

太祖應乾興運昭德定功仁明莊孝大聖武元皇帝諱  
吳木薛阿固達世祖第二子也母曰翼簡皇后納喇氏  
遼道宗時有五色雲氣屢出東方大若二千斛困倉之

狀司天孔致和竊謂人曰其下當生異人建非常之事  
天以象告非人力所能爲也咸雍四年戊申七月一日  
太祖生幼時與羣兒戲力兼數輩舉止端重世祖尤愛  
之世祖與拉必瑪察戰於野鵲水世祖被四創疾困坐  
太祖于膝循其髮而撫之曰此兒長大吾復何憂十歲  
好弓矢甫成童即善射一日遼使坐府中顧見太祖手  
持弓矢使射羣鳥連三發皆中遼使矍然曰奇男子也  
太祖嘗宴赫舍哩部呼爾罕家散步門外南望高阜使

衆射之皆不能至太祖一發過之度所至踰三百二十步宗室們圖琿最善射逮其不及者猶百步也天德三年立射碑以識焉世祖伐布呼太祖因希卜蘇請從行世祖不許而心異之烏春既死烏木罕請和既請和復來攻遂圍其城太祖年二十三被短甲免胄不介馬行圍號令諸軍城中望而識之壯士托雲乘駿馬持槍出城馳刺太祖太祖不及備舅氏和爾和馳出其間擊托雲槍折刺中其馬托雲僅得免嘗與北呼岱出營殺略

不令世祖知之且還敵以重兵追之獨行隘巷中失道  
追者益急值高岸與人等馬一躍而過追者乃還世祖  
寢疾太祖以事如遼統軍司將行世祖戒之曰汝速了  
此事五月未半而歸我猶及見汝也太祖往見和囉木  
薩噶統軍既畢事前世祖沒一日還至家世祖見太祖  
來所請事皆如志喜甚執太祖手抱其頸而撫之謂穆  
宗曰烏雅舒柔善惟此子足了契丹事穆宗亦雅重太  
祖出入必俱太祖遠出而歸穆宗必親迓之世祖已擒

拉必瑪察尚據哲克依水肅宗使太祖先取瑪察家屬  
康宗至哲克依水圍之太祖會軍親獲瑪察獻馘於遼  
遼命太祖為詳袞仍命穆宗希卜蘇罕都皆為詳袞久  
之以偏師伐尼瑪哈部伯赫布爾噶等乃以特通額為  
鄉導沿剌水夜行襲之虜其妻子初溫都部巴圖殺唐  
古部巴噶穆宗命太祖伐之太祖入辭謂穆宗曰昨夕  
見赤祥此行必克敵遂行是歲大雪寒甚與烏庫哩部  
兵沿屯水過摩琳鄉追及巴圖於額斯琿山北灤之間

殺之軍還穆宗親迓太祖於阿勒錦村薩哈以都統伐  
埒克們圖琿合實圖美伐達薩塔薩哈與將佐議或欲  
先平邊地部落城堡或欲徑攻埒克城議不能決願得  
太祖至軍中穆宗使太祖往曰事必有可疑軍之未發  
者止有甲士七十盡以畀汝們圖琿在穆魯密斯罕城  
下實圖美未到土人欲執們圖琿以與敵使來告急遇  
太祖於實都甸太祖曰國兵盡在此矣使敵先得志於  
們圖琿後雖種誅之何益也乃分甲士四十與之太祖



以三十人詣薩哈軍道遇人曰敵已據佛寧嶺南路矣  
衆欲由沙斑嶺往太祖曰汝等畏敵耶既度佛寧嶺不  
見敵已而聞敵乃守沙斑嶺以拒我及至薩哈軍夜急  
攻之遲明破其衆是時埒克烏塔皆在遼既破埒克還  
攻烏塔城城中人以城降初太祖過佛寧嶺經烏塔城  
下從騎有後者烏塔城人攻而奪之釜太祖駐馬呼謂  
之曰毋取我炊食器其人謾言曰公能來此何憂不得  
食太祖以鞭指之曰吾破埒克即於汝乎取之至是其

人持釜而前曰奴輩誰敢毀詳袞之器也遣普嘉努招  
卓多卓多乃降釋之穆宗將伐蕭哈里募兵得千餘人  
女直兵未嘗滿千至是太祖勇氣自倍曰有此甲兵何  
事不可圖也哈里來戰與遼兵合因止遼人自為戰渤  
海留守以甲贈太祖太祖亦不受穆宗問何為不受曰  
被彼甲而戰戰勝則是因彼成功也穆宗末年令諸部  
不得擅置信牌馳驛訊事號令自此始一皆自太祖啟  
之康宗七年歲不登民多流殍彊者轉而為盜罕都等

欲重其法為盜者皆殺之太祖曰以財殺人不可財者  
人所致也遂減盜賊徵償法為徵三倍民間多逋負責  
妻子不能償康宗與官屬會議太祖在外庭以帛繫杖  
端麾其衆令曰今貧者不能自活賣妻子以償債骨肉  
之愛人心所同自今三年勿徵過三年徐圖之衆皆聽  
令聞者感泣自是遠近歸心焉歲癸巳十月康宗夢遼  
狼屢發不能中太祖前射中之旦日以所夢問遼佐衆  
曰吉兄不能得而弟得之之兆也是歲康宗即世太祖

襲位為達貝勒遼使阿息保來讓曰何以不告喪太祖  
曰有喪不能弔而乃以為罪乎他日阿息保復來徑騎  
至康宗殯所閱賙馬欲取之太祖怒將殺之宗雄諫而  
止既而遼命父不至遼主好畋獵淫酗怠于政事四方  
奏事往往不見省赫舍哩阿蘇既奔遼穆宗取其城及  
其部衆不能歸遂與族弟尼楚赫薩里罕陰結南江居  
人歡塔博索欲俱亡入高麗事覺太祖使瓜爾佳薩哈  
捕之而尼楚赫薩里罕先為遼戍所獲歡塔博索已亡

去薩哈取其妻子而還二年甲午六月太祖至江西遼  
使使來致襲節度之命初遼每歲遣使市名鷹海東青  
于海上道出境內使者貪縱徵索無藝公私厭苦之康  
宗嘗以不遣阿蘇為言稍拒其使者太祖嗣節度亦遣  
普嘉努往索阿蘇故常以此二者為言終至于滅遼然  
後已至是復遣宗室實古納完顏尼楚赫往索阿蘇實  
古納等還具言遼主驕肆廢弛之狀於是召官僚耆舊  
以伐遼告之使備衝要建城堡修戎器以聽後命遼統

軍司聞之使節度使尼格來問狀曰汝等有異志乎修戰具飭守備將以誰禦太祖荅之曰設險自守又何問哉遼復遣阿息保來詰之太祖謂之曰我小國也事大國不敢廢禮大國德澤不施而逋逃是主以此字小能無望乎若以阿蘇與我請事朝貢苟不獲已豈能束手受制也阿息保還遼人始為備命統軍蕭朮卜嘉調諸軍于寧江州太祖聞之使富卦喇復索阿蘇實觀其形勢富卦喇還言遼兵多不知其數太祖曰彼初調兵豈

能遽集如此復遣華沙布往還言惟四院統軍司與寧  
江州軍及渤海八百人耳太祖曰果如吾言謂諸將佐  
曰遼人知我將舉兵集諸路軍備我我先發制之無  
為人制衆皆曰善乃入見宣靖皇后告以伐遼事后曰  
汝嗣父兄立邦家見可則行吾老矣無貽我憂汝必不  
至是也太祖感泣奉觴為壽即奉后率諸將出門舉觴  
東向以遼人荒肆不歸阿蘇并已用兵之意禱于皇天  
后土酌畢后命太祖正坐與僚屬飲號令諸部使傳勒

和徵伊蘭路都古嚕納兵烏楞古阿嚕撫諭幹琿集賽  
兩路係遼籍女直薩卜丹往安圖路執遼障鷹官達魯  
噶部副使色埒寧江州渤海大嘉努於是達魯噶部色  
爾衮來告曰聞舉兵伐遼我部誰從太祖曰吾兵雖少  
舊國也與汝隣境固當從我若畏遼人自往就之九月  
太祖進軍寧江州次寥晦城博勒和徵兵後期狀之復  
遣督軍諸路兵皆會于拉林水得二千五百人致遼之  
罪申告于天地曰世事遼國恪修職貢定烏春烏木罕



之亂破蕭哈里之衆有功不省而侵侮是加罪人阿蘇  
屢請不遣今將問罪於遼天地其鑒佑之遂命諸將傳  
梃而誓曰汝等同心盡力有功者奴婢部曲為良庶人  
官之先有官者敘進輕重祇功苟違誓言身死梃下家  
屬無赦師次唐古特旺結之地諸軍襁射介而立有光  
如烈火起於人足及戈矛之上人以為兵祥明日次札  
扎水光見如初將至遼界先使宗幹督士卒夷塹既渡  
遇渤海軍攻我左翼七穆昆衆少却敵兵直犯中軍舍

音出戰齊達先驅太祖曰戰不可易也遣宗幹止之宗  
幹馳出舍音前控止齊達馬舍音遂與俱還敵人從之  
耶律色實墜馬遼人前救太祖射救者斃併射色實中  
之有騎突前又射之徹扎洞胷色實拔箭走追射之中  
其背飲矢之半僨而死獲所乘馬宗幹與數騎陷遼軍  
中太祖救之免胄戰或自傍射之矢拂于額太祖顧見  
射者一矢而斃謂將士曰盡敵而止衆從之勇氣自倍  
敵大奔相蹂踐死者十七八薩哈在別路不及會戰使

人以戰勝告之而以色實馬賜之薩哈使其子宗翰完  
顏希尹來賀且稱帝因勸進太祖曰一戰而勝遂稱大  
號何示人淺也進軍寧江州諸軍填塹攻城寧江人自  
東門出溫特赫額圖琿邀擊盡殪之十月朔克其城獲  
防禦使大藥師努陰縱之使招諭遼人鐵驪部來送款  
次拉林城以俘獲賜將士召渤海梁福額特埒使之偽  
亡去招諭其鄉人曰女直渤海本同一家我興師伐罪  
不濫及無辜也使完顏羅索招諭係遼籍女直師還謁

宣靖皇后以所獲頒宗室耆老以色爾袞貲產給將士  
初命諸路以三百戶為穆昆十穆昆為明安綽哈等撫  
定成默水女直拜格酋長和索哩以城降十一月遼都  
統蕭嘉哩副都統托卜嘉將步騎十萬會于鴨子河北  
太祖自將擊之未至鴨子河既夜太祖方就枕若有扶  
其首者三寤而起曰神明警我也即鳴鼓舉燧而行黎  
明及河遼兵方壞陵道選壯士十輩擊走之大軍繼進  
遂登岸甲士三千七百至者纔三之一俄與敵遇于珠

赫店會大風起塵埃蔽天來風勢擊之遼兵潰遂至沃  
稜樂殺獲首虜及車馬甲兵珍玩不可勝計徧賜官屬  
將士燕犒彌日遼人嘗言女直兵滿萬則不可敵至是  
始滿萬云韓魯敗遼兵斬其節度使托卜嘉布呼等攻  
賓州拔之烏舍楚古爾蘇來降遼將實古爾戰于賓州  
布呼琿楚敗之鐵驪王和勒博以所部降烏達布芬徹  
復敗實古爾蕭伊蘇軍于祥州東韓琿集賽兩路降烏  
楞古敗遼軍于咸州西斬統軍錫埒于陣完顏羅索克

咸州是月烏奇邁薩哈布卜蘇率官屬諸將勸進願以  
新歲元日恭上尊號太祖不許阿里罕普嘉努宗  
翰等進曰今大功已建若不稱號無以繫天下心太祖  
曰吾將思之

收國元年正月壬申朔羣臣奉上尊號是日即皇帝位  
上曰遼以鑕鐵為號取其堅也鑕鐵雖堅終亦變壞惟  
金不變不壞金之色白完顏部色尚白於是國號大金  
改元收國丙子上自將攻黃龍府進臨益州州人走保

黃龍取其餘民以歸遼遣都統耶律鄂爾多左副統蕭  
伊蘇右副統耶律漳努都監蕭色佛呼騎二十萬步卒  
七萬戍邊留羅索尼楚赫守黃龍上率兵趨達嚕噶城  
次寧江州西遼使僧嘉努來議和國書斥上名且使為  
屬國庚子進師有火光正圓自空而墜上曰此祥徵殆  
天助也酌白水而拜將士莫不喜躍進逼達嚕噶城上  
登高望遼兵若連雲灌水狀顧謂左右曰遼兵心貳而情  
怯法雖多不足畏遂趨高阜為陳宗雄以右翼先馳遼

左軍左軍却左翼出其陣後遼右軍皆力戰羅索尼楚  
赫衝其中堅凡九陷陣皆力戰而出宗翰請以中軍助  
之上使宗幹往為疑兵宗雄已得利擊遼右軍遼兵遂  
敗乘勢追躡至其營會日已暮圍之黎明遼軍潰圍出  
逐北至阿魯岡遼步卒盡殫得其耕具數千以給諸軍  
是役也遼人本欲屯田且戰且守故併其耕具獲之三  
月師還三月辛未朔獲于寥晦城四月遼耶律漳努以  
國書來上以書辭慢侮留其五人獨遣漳努回報書亦



如之五月庚午朔避暑于近郊甲戌拜天射柳故事五  
月五日七月十五日九月九日拜天射柳歲以為常六  
月已亥朔遼耶律璋努復以國書來猶斥上名上復書  
亦斥遼主名以報之且諭其舉國來降七月戊辰以弟  
烏奇邁為安班貝勒國相薩哈為古倫貝勒希卜蘇為  
愛滿貝勒弟舍音為古倫貝勒甲戌遼使薩喇以書來  
留之不遣九百奚營來降八月戊戌上親征黃龍府次  
混同江無舟上使一人道前乘楮白馬徑涉曰視吾鞭

所指而行諸軍隨之水及馬腹後使舟人測其渡處深  
不得其底熙宗天眷二年以黃龍府為濟州軍曰利涉  
蓋以太祖涉濟故也九月克黃龍府遣薩喇還遂班師  
至江徑渡如前丁丑上至自黃龍府己卯黃龍見于空  
中癸巳以古倫貝勒薩哈為古倫烏喇哩貝勒阿里罕  
為古倫英寶貝勒冬十一月遼主聞取黃龍府大懼自  
將七十萬至圖們駙馬蕭特默林牙蕭扎拉等將騎五  
萬步四十萬至沃梭灤上自將禦之十二月己亥行次

約囉會諸將議皆曰遼兵號七十萬其鋒未易當吾軍  
遠來人馬疲乏宜駐于此深溝高壘以待從之遣都古  
魯訥尼楚赫鎮達嚕噶丁未上以騎兵親候遼軍獲督  
餉者知遼主以漳努叛西還二日矣是日上還至舒吉  
樂有光見于矛端戊申諸將曰今遼主既還可乘急追  
擊之上曰敵來不迎戰去而追之欲以此為勇邪衆皆  
悚愧願自效上復曰誠欲追敵約齋以往無事餽饋若  
破敵何求不得衆皆奮躍追及遼主于呼岱巴岡是役

也兵止二萬上曰彼衆我寡兵不可分視其中軍最堅  
遼主必在焉敗其中軍可以得志使右翼先戰兵數交  
左翼合而攻之遼兵大潰我師馳之橫出其中遼師敗  
績死者相屬百餘里獲輦轡幄兵械軍資他寶物馬  
牛不可勝計是戰舍音援矛殺數十人阿爾本被圍溫  
特赫德克德以四穆昆兵出之完顏蒙克身被數創力  
戰不已功皆論最蕭特默等焚營遁去遂班師兀爾佳  
薩哈取開州博勒和下德里城薩里罕降

二年正月戊子詔曰自破遼兵四方來降者衆宜加優恤自今契丹奚漢渤海係遼籍女直室韋達嚕噶烏舍鐵驪諸部官民已降或為軍所俘獲逃遁而還者勿以為罪其酋長仍官之且使從宜居處閏月高永昌據東京使北下嘉來求援高麗遣使來賀捷且求保州詔許自取之二月己巳詔曰比以歲凶庶民艱食多依附豪族因為奴隸及有犯法徵償莫辨折身為奴者或私約立限于人對贖過期則為奴者並聽以兩人贖一為良

若元約以一人贖者亦從約四月己丑以幹魯統內外諸軍與分撤都古嚕訥會咸州路都統烏楞古討高永昌華沙布等被害五月幹魯等敗永昌托卜嘉擒永昌以獻戮之于軍東京州縣及南路係遼女直皆降詔除遼法省稅賦置明安穆昆一如本朝之制以幹魯為南路都統德特貝勒額圖琿破遼兵六萬于昭蘇城九月己亥上獵近郊乙巳南路都統幹魯來見于巴密特水始製金牌十二月庚申朔安班貝勒烏奇邁及羣臣

上尊號曰大聖皇帝改明年爲天輔元年

天輔元年正月開州叛瓜爾佳薩哈等討平之古倫溫  
貝勒舍音以兵一萬取泰州四月遼秦晉國王耶律聶  
哱來伐都古嚕訥羅索博勒和將兵二萬會咸州路都  
統烏楞古擊之五月丁巳詔自收寧江州以後同姓爲  
婚者杖而離之七月戊申以完顏鄂倫知東京事八月  
癸亥高麗遣使來請保州十二月甲子烏楞古等敗耶  
律聶哱兵于蒺藜山拔顯州乾懿豪徽成川惠等州皆

降是月宋使登州防禦使馬政以國書來其畧曰日出  
之分實生聖人竊聞征遼屢破勁敵若克遼之後五代  
時陷入契丹漢地願畀下邑

二年正月庚寅遼雙州節度使張崇降使索多如宋報  
聘書曰所請之地今當與宋夾攻得者有之二月癸丑  
朔遼使耶律努格等來議和辛酉貝勒都古嚕訥羅索  
來見上以遼主近在中京而敗輒來杖之和勒博雙寬  
等言咸州都統烏撈古知遼主在中京而不進討芻糧



豐足而不以實聞攻顯州時所獲生口財畜多自取三月癸未朔命閣格代為都統而勸治之烏楞古坐降穆昆壬辰遼使耶律努格以國書來庚子以羅索言黃龍府地僻且遠宜重戍守乃命合諸路穆昆以羅索為萬戶鎮之四月辛巳遼使以國書來五月丙申命呼圖克昆如遼六月甲寅詔嚴禁民凌虐典雇良人及倍取贖直者甲戌遼通祺雙遼等州八百餘戶來歸命分置諸部擇膏腴之地處之七月癸未詔曰博囉水路完顏珠

勒呼渤海大嘉努等六穆昆貧民昔嘗給以官糧置之  
漁獵之地今歷日已久不知登耗可具其數以聞呼圖  
克昆還自遼耶律努格復以國書來丙申呼圖克昆如  
遼遼戶二百來歸處之泰州詔遣阿里庫理嘉努德呼  
台招諭未降者仍詔達嚕噶部貝勒色埒凡降附新民  
善為存撫來者令從便安居給以官糧毋輒動擾八月  
呼圖克昆還自遼耶律努格托廸復以國書來九月戊  
子詔曰國書詔令宜選善屬文者為之其令所在訪求

傳學雄才之士收遣赴闕閏月庚戌朔以降將霍石韓  
慶和為千戶九百奚部蕭實伊遜北部額哩頁漢人王  
六兒王伯龍契丹特默高從祐等各率衆來降遼耶律  
努格以國書來十月癸未以龍化州降者張應古劉仲  
良為千戶乙未咸州都統司言漢人李孝功渤海二哥  
率衆來降命各以所部為千戶十二月甲辰遣貝勒珠  
卜以定遼地諭高麗耶律努格以國書來遼懿州節度  
使劉宏以戶三千并執遼候人來降以為千戶川州寇

二萬已降復叛赫舍哩卓哩擊破之

三年正月甲寅東京人爲質者永吉等五人結衆叛事  
覺誅其首惡餘皆杖百沒入在行家屬資產之半詔知  
東京事鄂倫繼有犯者並如之內辰詔拜格貝勒綽哈  
曰呼嚕古達巴噶二部來送款若等先時不無交惡自  
今毋相侵擾三月耶律努格以國書來四月丙子朔日  
有食之五月壬戌詔咸州路都統司曰兵興以前哈斯  
罕輝法里與係遼籍不係遼籍女直戶有民犯罪流竄

邊境或亡入于遼者本皆吾民遠在異境朕甚憫之今  
既議和當行理索可明諭諸路千戶穆昆徧與詢訪其  
官稱名氏地里具錄以上六月辛卯遼遣太傅實訥埒  
等奉冊璽來上摘冊文不合者數事復之索多還自宋  
宋使馬政及其子宏來聘索多受宋團練使上怒杖而  
奪之宋使還復遣貝勒色埒赫魯等如宋七月辛亥遼  
人楊詢卿羅子韋各率衆來降命各以所部為穆昆八  
月己丑頒女直字九月以遼冊禮使失期詔諸路軍過

江屯駐十二月實訥埒等復以國書來海蘭甸長城高麗增築三尺詔呼魯古錫馨慎固營壘

四年二月色埒赫魯還自宋宋使趙良嗣王暉來議燕京西京地三月甲辰上謂羣臣曰遼人屢敗遣使求成惟飾虛辭以為緩師之計當議進討其令咸州路都統司治軍旅修器械具數以聞辛酉詔咸州路都統司曰朕以遼國和議無成將以四月二十五日進師令色克留兵一千鎮守棟庠以餘兵來會于渾河遼實訥埒以

國書來四月乙未上自將伐遼以遼使實納埒宋使趙良嗣等從行五月甲辰次渾河西使宗雄先趨上京遣降者馬義持語諭城中壬子至上京詔官民曰遼主失道上下同怨朕興兵以來所過城邑負固不服者即攻拔之降者撫恤之汝等必聞之矣今爾國和好之事反覆見欺朕不欲天下生靈久罹塗炭遂決策進討比遣宗雄等相繼招諭尚不聽從今若攻之則城破矣重以弔伐之義不欲殘民故開示明詔諭以禍福其審圖之

上京人恃禦備儲蓄為固守計甲寅亟命進攻上謂實  
訥孖趙良嗣等曰汝可觀我用兵以卜去就上親臨城  
督將士諸軍鼓譟而進自旦及已棟摩以麾下先登克  
其外城留守托卜嘉以城降趙良嗣等奉觴為壽皆稱  
萬歲是日赦上京官民詔諭遼副統伊都壬戌次沃赫  
河宗幹率羣臣諫曰地遠時暑車馬罷乏若深入敵境  
糧餽乏絕恐有後艱上從之乃班師命分兵攻慶州伊  
都襲棟摩於遼河完顏布達烏塔等戰却之完顏特庫



死馬七月癸卯上至自伐遼九月矩威水部錫勒哈達等殺貝勒緯哈布古德以叛十月戊辰朔日有食之戊寅命幹魯分呼嚕古烏春之兵以討錫勒哈達十一月東京留守司乞本京官民質子增數番代上不許曰諸質子已各受田廬若復番代則往來動搖可並仍舊十二月宋復使馬政來請西京之地

五年春正月幹魯敗錫勒哈達於哈達拉山誅首惡四人餘悉撫定二月遣昱及宗雄分諸路明安穆昆之民

萬戶屯泰州以博勒和統之賜耕牛五十四月乙丑朔  
宗翰請伐遼詔諸路預戒軍事五月遼都統耶律伊都  
等詣咸州降閏月辛巳古倫烏赫哩貝勒薩哈薨六月  
癸巳伊都與其將吏來見丙申千戶庫爾達坐擅署部  
人為富勒琿杖一百并罷其官庚子詔安班貝勒烏奇  
邁貳國政以溫貝勒舍音為烏赫哩貝勒普嘉努為溫  
貝勒宗翰為伊拉齊貝勒秋七月庚辰詔咸州都統司  
曰自伊都來灼見遼國事宜已決議親征其治軍以俟

師期尋以連雨乃罷親征命溫貝勒昱為都統伊拉齊  
貝勒宗翰副之帥師而西十一月辛丑以烏赫哩貝勒  
果為內外諸軍都統以昱宗翰宗幹宗望宗盤等副之  
甲辰詔曰遼政不綱人神共棄今欲中外一統故命汝  
率大軍以行討伐爾其慎重兵事擇用善謀賞罰必行  
糧餉必繼勿擾降服勿縱俘掠見可而進無淹師期事  
有從權毋須申稟戊申詔曰若克中京所得禮樂儀仗  
圖書文籍並先次津發赴闕

六年正月癸酉都統果克高恩圍統三城乙亥取中京  
遂下澤州二月庚寅朔日有食之己亥宗翰等敗遼奚  
王錫默于北安州降奚部西節度使額哩埒以本部降  
壬寅都統果遣使來奏捷并獻所獲貨寶詔曰汝等提  
兵于外克副所任攻下城邑撫安人民朕甚嘉之所言  
分遣將士招降山前諸部計悉已撫定續遣來報山後  
若未可往即營田牧馬俟及秋成乃圖大舉更當熟議  
見可則行如欲益兵具數來上不可恃一戰之勝輒有

弛慢新降附者當善撫存宣諭將士使知朕意宗翰駐  
北安遣希尹等略地獲遼護衛耶律實訥埒知遼主獵  
鴛鴦灤以其子晉王賢而有人望惡而殺之衆益離心  
雖有西北西南兩路兵馬皆羸弱遂遣諾延溫都等報  
都統果進兵襲之三月都統果出青嶺宗翰出瓢嶺追  
遼主于鴛鴦灤遼主奔西京宗翰復追至白水灤不及  
獲其貨寶已已至西京壬申西京降希尹追遼主于伊  
蘇部不及乙亥西京復叛是月遼秦晉國王耶律鼎埒

即位于燕四月辛卯復取西京壬辰遣圖克坦烏濟高慶裔如宋戊戌都統果自西京趨白水濼溫貝勒昱襲皮室部于德里川為敵所敗還會扎拉兵追至黃水北大破之耶律坦招徠西南諸部西至夏其招討使耶律佛德降金肅西平二郡漢軍四千餘人叛去耶律坦等襲取之棟摩羅索招降天德雲內寧邊東勝等州獲阿蘇而還是時山西城邑諸部雖降人心未固遼主保陰山耶律聶呼在燕京都統果遣宗望入奏請上臨軍五

月辛酉宗望來奏投百官入賀賜宴歡甚先是獲遼樞密使德哱台節度使和尚伊勒希額哩頁等都統果使阿林護送赴闕德哱台道亡阿林坐誅耶律聶哱遣使請罷兵戊寅使楊勉以書諭聶哱使之降瑪克實遣其子濟爾噶濟貢方物六月戊子朔上親征遼發自上京命安班貝勒烏奇邁監國辛亥詔諭上京官民曰朕順天弔伐已定三京但以遼主未獲兵不能已今者親征欲由上京路進恐撫定新民驚疑失業已出自登穆魯

其先降後叛逃入險阻者詔後出首悉免其罪若猶拒  
命拏戮無赦是月耶律聶呼卒幹魯羅索敗夏人于野  
谷七月甲子詔諸將無得遠迎以廢軍務乙丑上京漢  
人毛八十率二千餘戶降因命領之丙寅以額特埒招  
降者衆命領八千戶以呼遜副之壬午希尹以阿蘇見  
杖而釋之八月乙丑次鴛鴦濼都統杲率官屬來見癸  
巳上追遼主于大魚濼昱宗望追及遼主于石輦鐸戰  
敗之遼主遁己亥次居延北辛丑中京將完顏瑋楚敗



契丹奚漢六萬于高州貝勒瑪奇死之達勒達穆爾部  
降昱宗望追遼主于諤勒哲圖不及九月庚申次草澤  
棟摩平中京部族之先叛者及招撫沁海郡縣節度使  
耶律慎思領諸部入內地乙丑詔六部奚曰汝等既降  
復叛扇誘衆心罪在不赦尚以歸附日淺恐綏懷之道  
有所未孚故復令招諭若能速降當釋其罪官皆仍舊  
歸化州降戊辰次歸化州甲戌宗雄薨丁丑奉聖州降  
十月丙戌朔次奉聖州詔曰朕屢勅將臣安輯懷附撫

或侵擾然愚民無知尚多逃匿山林即欲加兵深所不忍今其逃散人民罪無輕重咸與矜免有能率衆歸附者授之世官或奴婢先其主降並釋為良其布告之使諭朕意蔚州降唐寅伊都等遣蔚州降臣翟昭彥徐興田慶來見命昭彥慶皆為刺史興為團練使詔曰比比以幽薊一方招之不服今欲帥師以往故先安撫山西諸部汝等既已懷服宜加撫存官民未附已前罪無輕重及餘官逋負皆與釋免諸官各遷叙之丁酉蔚州翟昭

彥田慶殺知州事蕭觀寧等以叛丙午復降十一月詔諭燕京官民王師所至降者赦罪復官十二月上親伐燕京宗望率兵七千以先之都古魯訥出得勝口尼楚赫出居庸關羅索為左翼博勒和為右翼取居庸關丁亥次妯州戊子次居庸關庚寅遼統軍都監高陸等來送款上至燕京入自南門使尼楚赫羅索陳于城上乃次于城南遼知樞密院左企弓虞仲文樞密使曹勇義副使張彥忠參知政事康公弼僉書劉彥宗奉表降辛

金史卷一百一十五  
耶撻百官詣軍門叩頭請罪詔一切釋之壬辰上御德勝殿羣臣稱賀甲午命左企弓等撫定燕京諸州縣詔西京官吏曰乃者師至燕都已皆撫定唯蕭妃與官屬數人遁去已發兵追襲或至彼路可執以來黃龍府叛宗輔討平之

七年正月丁巳遼奚王和勒博僭稱帝甲子遼平州節度使時立愛降詔曲赦平州又詔安班貝勒曰比者遣昂徙諸部民人于嶺東而昂悖戾騷動煩擾致多怨叛

其違命失衆當寘重典若或有疑禁錮以待庚午詔中  
京都統鄂倫曰聞御撫定人民各安其業朕甚嘉之而和  
勒博聚徒逆命汝宜計畫無使滋蔓士申詔招諭和勒  
博癸酉以時立愛言招撫諸部已卯宋使來議燕京西  
京地庚辰宜錦乾顯成川豪懿等州皆降甲申詔曰諸  
州部族歸附日淺民心未寧今農事將興可遣分諭典  
兵之官無縱軍士動擾人民以廢農業二月乙酉朔命  
薩巴詔諭興中府降之遼來州節度使田顯隱州刺史

杜師回遷州刺史高永福潤州刺史張成皆降壬辰詔  
安班貝勒曰郡縣今皆撫定若有逃散未降者已釋其  
罪更宜招諭之前後起遷戶民去鄉未久豈無懷土之  
心可令所在有司深加存恤毋輒有騷動衣食不足者  
官賑貸之癸巳詔曰頃因兵事未息諸路關津絕其往  
來今天下一家若仍禁之非所以便民也自今顯成東  
京等路往來聽從其便其間被虜及鬻身者並許自贖  
為良仍令馳驛布告興中宜州復叛宋使趙良嗣來請

加歲幣以代燕稅及議畫疆與遣使賀正旦生辰置榷  
場交易并計議西京等事癸卯尼楚赫道拉如宋已  
詔都統果曰新附之民有材能者可錄用之戊申詔平  
州官與宋使同分割所與燕京六州之地癸丑大赦是  
月改平州為南京以張覺為留守三月甲寅朔將誅昂  
以希卜蘇諫杖之七十仍拘泰州戊午都統果等言郎  
律瑪展伊都烏舍道拉等謀叛宜早圖之上召伊都從  
容謂之曰朕得天下皆我君臣同心同德以成大功固

非汝等之力今聞汝等謀叛若誠然耶必須鞍馬甲冑器械之屬當悉付汝朕不食言若再為我擒無望免死欲留事朕無懷異志吾不汝疑也伊都戰慄不能對命杖道拉七十餘並釋之宋使盧益趙良嗣馬宏以國書來四月丁亥遣幹魯宗望襲遼主于陰山壬辰復書于宋師初入燕遼兵復犯奉聖州林牙達實壁龍門東二十五里都統幹魯聞之遣卓哩羅索馬和尚等率兵討之生獲達實悉降其衆癸巳詔曰自今軍事若皆中覆



不無留滯應此路事務申都統司餘皆取決樞密院契  
丹糾堅聚黨興中府作亂擒之糾堅自殺命實古納博  
勒和監護長勝軍及燕京豪族工匠由松亭關徙之內  
地己亥次儒州幹魯宗望等襲遼權六院司客勒扎于  
白水濶獲之其宗屬秦王許王等十五人降聞遼主留  
輜重青塚以兵萬人往應州遣卓哩布達宗望羅索尼  
楚赫等追襲之宗望追及遼主決戰大敗之獲具于趙  
王寶訥埒及傳國璽五月甲寅南京留守張覺據城叛

丙寅次野狐嶺己巳次拉林溧幹魯等以趙王寶訥埒  
林牙達寶駙馬儒努等來獻并上所獲國璽宗雋以所  
俘遼主子秦王訐王女額頁等來見奚路都統達蘭攻  
蘇庫卓琳托紐所部十三巖皆平之又遣奚馬和尚攻  
薩必達嚕噶并五院司諸部執其節度伊里和勒博為  
其下所殺辛巳詔諭南京官民六月壬午朔次駕驂溧  
是日棟摩敗張覺于營州丙申上不豫將還上京乃命  
伊拉齊貝勒宗翰為都統溫貝勒昱德特貝勒幹魯副

之駐兵雲中以備邊己酉次鰲都山命驛召安班貝勒  
烏奇邁七月辛酉次牛山宗翰還軍中八月辛巳朔日  
有食之乙未次渾河北安班貝勒烏奇邁率宗室百官  
上謁戊申上崩于布圖濤西行宮年五十六九月癸丑  
梓宮至上京乙卯葬于宮城西南之寧神殿丙辰安班  
貝勒即皇帝位天會三年三月上尊諡曰武元皇帝廟  
號太祖立原廟于西京天會十三年二月辛酉改葬和  
陵立開天啟祚睿德神功之碑于燕京城南嘗所駐蹕

之地皇統四年改和陵曰睿陵五年十月增諡應乾興  
運昭德定功睿神莊孝仁明大聖武元皇帝真元三年  
十一月改葬于大房山仍號睿陵

贊曰太祖英謨叡略豁達大度知人善任人樂為用世  
祖陰有取遼之志是以兄弟相授傳及康宗遂及太祖  
臨終以太祖屬穆宗其素志蓋如是也初定東京即除  
去遼法減省租稅用本國制度遼主播越宋納歲幣以  
幽薊武朔等州與宋而置南京于平州宋人終不能守

燕代卒之遼主見獲宋主被執雖功成于天會間而規  
摹運為實自此始金有天下百十有九年太祖數年之  
間算無遺策兵無留行底定大業傳之子孫嗚呼雄哉

金史卷二

欽定四庫全書

金史卷三

元中書右丞相總裁托克托等修

本紀第三

太宗

太宗體元應運世德昭功哲惠仁聖文烈皇帝諱晟本諱烏奇邁世祖第四子母曰翼簡皇后納喇氏太祖母弟也遼太康元年乙卯歲生初為穆宗養子收國元年

七月為安班貝勒太祖四出征伐常居守天輔五年賜詔曰汝惟朕之母弟義均一體是用汝貳我國政凡軍事違者聞實其罪從宜處之其餘事無大小一依本朝舊制天輔七年六月太祖次鴛鴦濼有疾至諤都山驛召赴行在詔曰今遼主盡喪其師奔于夏國遼官多囉約索等刼其子雅里而立之已留宗翰等措畫朕親巡已久功亦大就所獲州部政須綏撫是用還都八月中旬可至春州汝率內戚迎我若至豹子崖尤善八月乙



未會于渾河北戊申太祖崩九月乙卯葬太祖于宮城  
西南古倫貝勒果鄆王昂宗峻宗幹率宗親百官請正  
帝位不許固請亦不許宗幹率諸弟以赭袍被體寘璽  
懷中丙辰即皇帝位己未告祀天地丙寅大赦中外改  
天輔七年為天會元年癸酉發春州粟賑降人之徙于  
上京者戊寅詔諸明安賦米給戶口在內地匱乏者南  
路軍帥棟摩敗張覺于樓峯口十月壬辰詔以空名宣  
頭百道給西南西北兩路都統宗翰曰今寄爾以方面

如當遷授必待奏請恐致稽滯其以便宜從事己亥上  
京慶元寺僧獻佛骨却之棟摩及張覺戰于兔耳山棟  
摩敗績十一月壬子命宗望問棟摩罪以其兵討張覺  
壬戌復以空名宣頭及銀牌給上京路軍帥實古紉博  
勒和等癸亥宗望以棟摩軍發廣寧下瀕海諸郡縣詔  
諭南京割武朔二州入于宋羅索破朔州西山擒其帥  
趙公直貝勒幹魯別及博爾蘇破走伊實布達於歸化  
己巳徙遷潤來隰四州之民于潘州庚午宗望及張覺

戰于南京東大敗之張覺奔宋城中人執其父及二子以獻戮之軍中壬申張忠嗣張敦固以南京降遣使與張敦固入諭城中復殺其使者以叛己卯詔女直人先有附于遼今復虜獲者悉從其所欲居而復之其奴婢部曲皆雖逃背今能復歸者並聽為民十二月辛巳蠲民間貸息詔以咸州以南蘇復州以北年穀不登其應輸南京軍糧免之甲午詔曰比聞民間貧苦乏食至有鬻其子者其聽以丁力相等者贖之是日以古倫貝勒

果為安班貝勒宗幹為古倫貝勒遣貝勒李靖如宋告  
哀

二年春正月庚戌朔以們圖琿為阿斯罕貝勒參議國  
政壬子命賞宗望及將士克南京之功赦棟摩罪甲寅  
以空名宣頭五十銀牌十給宗望戊午詔貝勒完顏愛  
寶拉曰先帝以同姓之人有自鬻及典質其身者命官  
為贖今聞尚有未復者其悉閱贖之癸亥以東京比歲  
不登詔減田租市租之半甲戌西南西北兩路都統宗

翰宗望請勿割山西郡縣與宋上曰是違先帝之命也  
其速與之夏國奉表稱藩以下寨以北陰山以南伊蘇  
伊喇部圖嚕朮西之地與之丙子貽宋書索俘虜叛亡  
丁丑始自京師至南京每五十里置驛二月詔有盜發  
遼諸陵者罪死庚寅詔命給宗翰馬七百匹田種千石  
米七千石以賑新附之民丁酉命徙伊蘭路達貝勒完  
顏忠于蘇伯水乙巳詔諭南京官僚小大之事必關白  
軍帥無得專達朝廷丙午宗翰乞濟師詔有司選精兵

五千給之丁未命宗望凡南京留守及諸闕員可運動  
賢有人望者就注擬之具姓名官階以聞三月己酉朔  
命宗望以宋歲幣銀絹分賜將士之有功者庚戌叛人  
呼必泰降詔釋之宗望請選良吏招撫遷潤來隰之民  
保山砦者從之己未宗望以南京反覆凡攻取之計乞  
與知樞密院事劉彥宗裁決之劉公胄王永福棄家踰  
城來降以公胄為廣寧尹永福為奉先軍節度使辛未  
夏國王李乾順遣使上誓表閏月戊寅朔賜夏國誓詔

辛巳命置驛上京春泰之間己丑烏庫哩達魯特兩部  
來降丙午既許割山西諸鎮與宋以宗翰言罷之是月  
舍音襲約尼扎古雅走之獲其妻孥羣從及豪族貝勒  
琿楚等破奚七巖而撫其民人四月己酉以宗翰經略  
西夏及破遼功賜以十馬使自擇其二餘以分諸帥賑  
上京路西北路降者及新徙嶺東之人戊午以實古納  
所築上京新城名會平州乙亥詔贖上京路新遷寧江  
州戶口賣身者六百餘人宋遣使來吊喪以高卓佛和

等充遺留國信使高興輔劉興嗣等充告即位國信使  
如宋五月丁丑朔上京軍帥實古納以所獲印綬二十  
二及銀牌來上癸未詔曰新降之民訴訟者衆今方農  
時或失田業可俟農隙聽決丁亥博索路明安富勒呼  
以賊罷以穆昆實訥埒代之乙巳海蘭路軍帥完顏呼  
魯古等言往者歲捕海狗海東青鴉鵲於高麗之境近  
以二舟往彼乃以戰艦十四要而擊之盡殺二舟之人  
奪其兵仗上曰以小故起戰爭甚非所宜今後非奉命



母輒往棟摩瓦南京殺都統張敦固七月壬午皇子宗  
峻薨丙戌禁外方使介冗從多者壬辰和碩台言高麗  
納吾叛亡增其邊備必有異圖詔曰納我叛亡而弗歸  
其曲在彼凡有通問毋違常式或來侵略整爾行列與  
之從事敢先犯彼者雖捷必罰乙未以烏渾部及諸營  
叛以齊貝勒昱等討平之八月乙巳朔以貝勒烏哲訥  
等為賀宋生辰使丁巳薩里罕部明安齊蘇以賊罷以  
奚金嘉努代之六部都統達蘭擊走扎古雅殺其隊將

克爾叟博斯呼等又破降駱駝山金源興中諸軍詔增  
給銀牌十十月甲辰朔夏國遣使謝誓詔戊午天清節  
宋夏遣使來賀甲子詔發寧江州粟賑泰州民被秋潦  
者約尼扎古雅率衆來降興中府降丙寅詔有司運米  
五萬石于廣寧以給南京潤州戊卒命南路軍帥棟摩  
以甲士千人益哈斯罕路貝勒完顏受實拉以備高麗  
戊辰西南西北兩路權都統韓魯言遼詳袞托卜嘉來  
奔言耶律達實自稱為王置南北官屬有戰馬萬匹遼

主從者不過四千戶有步騎萬餘欲趨天德駐伊都谷  
詔曰追襲遼主必酌事宜其討達實則俟報下十一月  
癸未棟摩下宜州拔叔牙山殺節度使韓慶民癸卯詔  
以米五萬石給達蘭實古納十二月戊申以貝勒高居  
慶等為賀家正旦使

三年正月癸酉朔宋夏遣使來賀戊子同知宣徽院事  
韓資正加尚書左僕射為諸宮都部署乙未夏遣使奠  
幣及賀即位宋遣使賀即位二月壬戌羅索獲遼主于

伊都谷丁卯以巴噶城地分授所徙烏庫哩德呼勒二部及契丹民三月乙亥阿斯罕貝勒們圖琿薨丙子賑奚契丹新附之民辛巳建乾元殿幹魯獻傳國寶以瑪克實來附請授印綬是日賜完顏羅索鐵券四月壬寅朔詔以遼主赴京師丁巳南路軍帥扎拉以罪罷五月己丑蕭巴錦獲遼玉寶來獻六月庚申以獲遼主遣李用和等充告慶使如宋七月壬申禁内外官宗室母私役百姓己卯南京帥以錦州野蠶成蠶奉其絲綿來獻

命賞其長吏詔權勢之家毋買貧民為奴其曾買者一人償十五人詐買者一人償二人皆杖一百甲申詔南京括官豪牧馬以等第取之分給諸軍以耶律固等為宋報謝使八月癸卯幹魯以遼主至京師甲辰告于太祖廟丙午遼主延禧入見降封海濱王壬子詔有司揀閱善射勇健之士以備宋九月壬午廣寧府獻嘉禾癸巳保州路達貝勒瓜爾佳薩哈以罪誅以貝勒圖克坦烏里代之十月甲辰詔諸將伐宋以安班貝勒杲兼領

都元帥伊拉齊貝勒宗翰兼左副元帥先鋒經略使完顏希尹為元帥右監軍左金吾上將軍耶律伊都為元帥右都監自西京入太原六部路軍帥達蘭為六部路都統舍音副之宗望為南京路都統揀摩副之知樞密院事劉彥宗兼領漢軍都統自南京入燕山詔建太祖廟于西京召頁魯赴京師教授女直字戊申有司言權南路軍帥和碩台官吏貪縱詔鞠之壬子天清節宋夏遣使來賀丁巳以揀摩為南京路都統素赫副之宗望

為棟摩劉彥宗兩軍監戰壬戌詔曰今大有年無儲蓄  
則何以備饑饉其令牛一具賦粟一石每穆昆為一廩  
貯之宋易州戍將韓民毅以軍降處之蔚州十一月庚  
辰以降封遼主為海濱王詔中外辛卯南路軍帥司請  
禁契丹奚漢人挾兵器詔勿禁以張忠嗣權簽南京中  
書樞密院事十二月庚子宗翰下朔州甲辰宗望諸軍  
及宋郭藥師張金徽劉舜仁戰于白河大破之布希敗  
宋兵于古北口丙午郭藥師降燕山州縣悉平戊申宗

翰克代州乙卯中山降丙辰宗望破宋兵五千于真定  
戊午宗翰圍太原耶律伊都破宋河東陝西援兵于汾  
河北甲子宗望克信德府

四年春正月丁卯朔始朝日降臣郭藥師董才皆賜姓  
完顏氏戊辰宗弼取湯陰大臭攻下濬州達呼布取黎  
陽己巳諸軍渡河庚午取滑州宗望使吳孝民等入汴  
問宋取首謀平山童貫譚稹詹度及張覺等宋太上皇  
帝出奔癸酉諸軍圍汴甲戌宋使李稅來謝罪且請修



好宗望許宋修好約質割三鎮地增歲幣載書稱伯姪  
戊寅宋以康王構少宰張邦昌為質辛巳宋上誓書地  
圖稱姪大宋皇帝伯大金皇帝癸未諸軍解圍二月丁  
酉朔夜宋將姚平仲兵四十萬來襲宗望營敗之己亥  
復進師圍汴宋使宇文虛中以書來改以肅王樞為質  
遣康王構歸師還壬子以滑瀋二州與宋宗翰定威勝  
軍攻下降德府丁巳次澤州海濱王家奴誣其主欲亡  
去詔誅其首惡餘並杖之三月癸未尼楚赫圍太原宗

翰還西京四月癸卯宗望使宗弼來奏捷乙丑耿守忠等大敗宋人于西都谷五月辛未宋种師中以兵出井陘癸酉完顏和尼敗之于殺熊嶺斬師中於陣是日巴爾斯敗宋姚古軍於隆州谷六月丙申朔高麗國王王楷奉表稱藩庚戌宗望獻所獲三象庚申以宗望為右副元帥七月丙寅遣高伯淑等宣諭高麗壬申出金牌命貝勒大臭以所領渤海軍八明安為萬戶戊子以圖埒部長多囉璽不從其兄古爾班叛賜馬十一疋百錢

五百萬蕭仲恭使宋還以所持宋帝與耶律伊都蠟書  
自陳八月庚子詔左副元帥宗翰右副元帥宗望伐宋  
宋張灝率兵出汾州巴爾斯擊走之劉臻以兵出壽陽  
羅索破之庚戌宗翰伐西京辛亥羅索等破宋張灝軍  
于文水癸丑宗望發保州是日耶律鐸破宋兵于雄州  
納延等敗宋兵于中山甲寅新城縣進白鳥庚申托紐  
取新樂九月丙寅宗翰克太原執經略使張孝純呼沙  
呼取平遙靈石孝義介休諸縣已已復以南京為平州

辛未宗望破宋种師閔軍於井陘取天威軍克真定殺其守李邈十月羅索克汾州石州降芬徹克平定軍遼州降丁未天清節高麗夏遣使來賀中京進嘉禾十一月甲子宗翰自太原趨汴丙寅宗望自真定趨汴戊辰宗翰下威勝軍癸酉薩喇達破天井關乙亥宗翰克隆德府和尼渡盟津西京永安軍鄭州皆降庚辰宗翰克澤州宗望諸軍渡河臨河大名二縣德清軍開德府皆下丙戌克懷州是日宗望至汴閏月壬辰朔宋出兵拒

戰宗望等擊敗之癸巳宗翰至汴丙辰克汴城庚申以  
高隨充高麗生日使辛酉宋主桓出居青城十二月癸  
亥宋主桓降是日歸于汴城庚辰詔曰朕惟國家四境  
雖遠而兵革未息田野雖廣而畎畝未闢百工略備而  
祿秩未均方貢僅修而賓館未贍是皆出乎民力苟不  
務本業而抑游手欲上下皆足其可得乎其令所在長  
吏敦勸農功

五年正月辛卯朔高麗夏遣使來賀癸巳宗翰宗望使

使以宋主降表來上乙未知樞密院事劉彥宗上表請  
復立趙氏不聽丁巳回鶻哈喇汗遣使入貢二月丙寅  
詔降宋二帝為庶人三月丁酉立宋少宰張邦昌為大  
楚皇帝割地賜夏國四月乙酉克陝府取虢州丙戌以  
六部路都統達蘭為元帥左監軍南京路都統棟摩為  
元帥左都監宗翰宗望以宋二帝歸己丑詔曰哈斯罕  
諸部與新附人民其在降附之後同姓為婚者離之五  
月庚寅朔宋康王構即位於歸德宋殺張邦昌羅索降

解絳慈隰石河中苛嵐寧化保德火山諸城達蘭徇地  
山東下密州達呼下單州廣信軍降六月庚申詔曰自  
河之北今既分畫重念其民或見城邑有被殘者不無  
疑懼遂命堅守若即討伐生靈可愍其申諭以理招輯  
安全之儻執不移自當致討若諸軍敢利於俘掠輒肆  
蕩毀者底于罰庚辰右副元帥宗望薨漢國王宗傑繼  
薨七月甲午賜宗翰券書除反逆外咸貫勿論以石州  
戍將烏瑄棄城喪師杖之削其官八月戊寅以宋捷遣

耶律居謹等充宣慶使使高麗丙戌以宗輔為右副元帥詔曰河北河東郡縣職員多闕宜開貢舉取士以安新民其南北進士各以所業試之九月丁未詔曰內地諸路每耕牛一具賦粟五斗以備歉歲辛亥賜元帥右監軍完顏希尹萬戶尼楚赫券書除赦所不原餘並勿論棟摩取河間大敗宋兵于莫州雄州降達蘭克祁州永寧軍保州順安軍皆降冬十月丁卯沙州回鶻呼喇繳汗復遣使入貢辛未天清節高麗夏遣使來賀宋二



帝自燕徙居于中京十二月丙寅右副元帥宗輔伐宋  
徇地淄青烏凌阿托雲敗宋將李成于淄州趙州降阿  
里庫徇地濬州敗敵兵遂取滑州乙亥西南路都統幹  
魯薨己卯色哩下汝州

六年正月丙戌朔高麗夏遣使來賀宗弼破宋鄭宗孟  
軍于青州尼楚赫取鄧州蘇瑪拉入襄陽巴爾斯入均  
州馬武取房州癸巳克青州癸卯棟摩克灘州丁未達  
呼布敗宋將趙子昉兵薩里罕敗宋兵于河上甲寅宋

將馬括兵次樂安宗輔擊敗之聞宋主在維揚以農時  
還師宗弼敗宋兵于河上二月乙卯朔巴爾斯取唐州  
癸亥取蔡州己巳伊喇古敗宋將臺宗雋等兵于大名  
庚午再破其軍獲臺宗雋及宋忠甲戌巴爾斯取陳州  
癸未克穎昌府鄭州叛入于宋復取鄭州遷洛陽襄陽  
穎昌汝鄭均房唐鄧陳蔡之民于河北宗翰復遣羅索  
攻下同華京兆鳳翔擒宋經制使傅亮阿林破河中韓  
魯入馮翊三月壬辰命南路軍帥實古納籍節度使完

顏慎思所領諸部及未置明安穆昆戶來上己酉達蘭  
下思州五月戊戌伊遜特古斯以本部來附六月己未  
詔求祖宗遺事達蘭遣兵徇下磁州信德府真定賊自  
稱元帥秦王薩里罕討平之七月乙巳宋主遣使奉表  
請和詔進兵伐之以宋二庶人赴上京八月乙卯羅索  
敗宋兵于華州額特埒破敵于渭水遂取下邽丁丑以  
宋二庶人素服見太祖廟遂入見于乾元殿封其父昏  
德公子重昏侯是日告于太祖廟以州郡職員名稱及

俸給因革詔中外九月辛丑勝額等敗宋兵于蒲城甲辰又破敵于同州乙丑取丹州十月丙寅天清節高麗夏遣使來賀癸酉知樞密院事劉彥宗薨丁丑芬徹羅索敗宋兵于臨真戊寅徙昏德公重昏侯于韓州庚辰宗翰宗輔會于濮伐宋十一月庚寅芬徹羅索取延安府壬辰賑伊蘭路乙未取濮州綏德軍降羅索再攻晉寧軍其守徐徽言固守不能克十二月丙辰宗弼取開德府丁卯宗輔克大名府呼沙呼敗宋兵于鞏

七年正月庚辰朔高麗夏遣使來賀辛巳吳國王棟摩  
薨甲午以南京留守韓企先同中書門下平章事知樞  
密院事二月戊辰宋麟府路安撫使折可求以麟府豐  
三州降己巳羅索色哩呼沙呼等破晉寧軍其守徐徽  
言據子城拒戰庚午率衆潰圍走擒之使之拜不拜臨  
之以兵不動命降將折可求諭之降指可求大罵出不  
遜語遂殺之其統制孫昂及士卒皆不屈盡殺之甲戌  
詔禁醫巫閭山遼代山陵樵採三月己卯朔日中有黑

子壬寅詔軍興以來良人被略為驅者聽其父母夫妻  
子贖之尚書左僕射高真罷四月芬徹羅索取廊坊二  
州五月乙卯巴爾斯等襲宋主于揚州九月丙午朔日  
有食之庚午宗弼敗宋兵于睢陽辛未降其城是月曹  
州降十月丙子朔京兆府降丁丑鞏州降庚寅天清節  
高麗夏遣使來賀丁酉阿里當堪大臭破敵于壽春己  
亥安撫使馬世元以城降甲辰廬州降十一月庚戌徙  
哈斯罕都統司治寧州乙卯高麗遣使來貢丙辰宗弼

取和州壬戌宗弼渡江敗宋副元帥杜充軍于江寧丁卯守臣陳邦光以城降十二月丙戌宗弼取湖州丁亥克杭州阿里富埒瑄追宋主于明州越州降大臬敗宋樞密使周望于秀州又敗宋兵于杭州東北戊戌阿里富埒瑄敗宋兵于東關遂濟曹娥江壬寅敗宋兵于高橋宋主入于海

八年正月甲辰朔高麗夏遣使來賀丁巳以同中書門下平章事韓企先為尚書左僕射兼侍中己未阿里富

埒瑄克明州執其守臣趙伯諤庚申詔曰避役之民以  
微直鬻身權貴之家者悉出還本貫阿里布色哩頁下  
太平順昌及濠州是月宋副元帥杜充以其衆降二月  
乙亥宗弼還自杭州庚寅取秀州戊戌取平江汴京亂  
三月丁卯達達哩復取之宗弼及宋韓世忠戰于鎮江  
不利四月丙申復戰于江寧敗之諸軍渡江是日阿里  
布戰于拓臯己亥周企戰于壽春辛丑羅索戰于淳化  
皆勝之醴州降遂克邵州五月癸卯禁私度僧尼及繼



父繼母之男女無相嫁娶戊申詔曰河北河東簽軍其家屬流寓河南被俘掠為奴婢者官為贖之俾復其業六月壬申詔遣遼統軍使耶律喀勒扎節度使蕭必埒哩等十人分治新附州鎮癸酉詔以昏德公六女為宗婦七月辛亥詔給泰州都統博勒和所部諸穆昆甲冑各五十先遣羅索經略陝西所下城邑叛服不常其監戰阿里布請益兵帥府會諸將議曰兵威非不足綏懷之道有所未盡誠得位望隆重恩威兼濟者以往可指

日而定若以皇子右副元帥宗輔往為宜以聞詔曰羅  
索往者所向輒克今使專征陝西淹延未定豈倦于兵  
而自愛耶關陝重地卿等其戮力焉丁卯上如東京溫  
湯徙昏德公重昏侯于呼爾哈路九月戊申立劉豫為  
大齊皇帝世修子禮建都大名府辛酉安班貝勒都元  
帥杲薨癸亥宗輔等敗宋張浚軍于富平耀州降乙丑  
鳳翔府降十月乙亥上至自東京齊帝劉豫遣使謝封  
冊甲申天清節齊高麗夏遣使來賀以鐵驪圖嚕拉同

中書門下平章事詔遼宋官上本國誥命等第換授十  
一月甲辰宗輔下涇州丁未渭州降敗宋劉俛軍于瓦  
亭戊申原州降宋涇原路統制張中孚知鎮戎軍李彥  
琦以衆降馬武等擊宋吳玠軍于隴州庚戌以遙鎮節  
度使烏克紳等為齊劉豫生日使癸亥宗輔以陝西事  
狀聞詔獎諭之十二月丁丑完顏羅索薨乙酉宗輔敗  
宋劉維輔軍壬辰熙州降

九年正月己亥朔齊高麗夏遣使來賀戊申命以圖們

水以西和博錫磬珊沁三水以北閑田給海蘭路諸穆  
昆辛亥富察哈布爾完顏圖哩計張萬敵于白馬湖陷  
于敵癸丑以同中書門下平章事時立愛為侍中知樞  
密院張忠嗣為宣政殿大學士知三司使事宗弼阿里  
布撫定鞏洮河樂西寧蘭廓積石等州涇原熙河兩路  
皆平四月己卯詔新徙戍邊戶匱于衣食有典質其親  
屬奴婢者官為贖之戶計其口而有二者以官奴婢  
益之使戶為四口又乏耕牛者給以官牛別委官勸督

田作戍戶及邊軍資糧不繼糴粟于民而與賑卹其續  
遷戍戶在中路者姑止之即其地種藝俟畢獲而行及  
來春農時以至戍所五月丙午分遣使者諸路勸農六  
月壬辰賜昏德公重昏侯時服各兩襲八月辛巳回鶻  
鄂約遣使來貢九月己酉和州回鶻執耶律達實之黨  
薩巴迪里托多來獻十月戊寅天清節齊高麗夏遣使  
來賀薩里罕攻下慶陽慕洧以環州降宗弼與宋吳玠  
戰于和尚原敗績十一月己未遷趙氏疎屬于上京以

陝西地賜齊

卷三

十年正月癸巳朔齊高麗夏遣使來賀己酉齊表謝賜地壬子詔曰昔遼人分士庶之族賦役皆有等差其悉均之二月庚午賑上京路戍邊明安民四月丁卯詔諸良人知情嫁奴者聽如故為妻其不知而嫁者去住悉從所欲伊拉齊貝勒左副元帥宗翰朝京師庚午以太祖孫亶為安班貝勒皇子宗磐為古倫烏赫哩貝勒古倫貝勒宗幹為古倫左貝勒伊拉齊貝勒左副元帥宗

翰為古倫右貝勒兼都元帥右副元帥宗輔為左副元帥庚寅聞鴨綠混同江水暴漲命徙戍邊戶在混同江者出粟賑之閏月辛卯詔分遣呼沙呼等十二人閱諸路丁壯調赴軍七月甲午賑泰州路戍邊戶上如中京九月元帥右都監耶律伊都謀反出奔其黨燕京統軍使蕭高陸伏誅蔚州節度使蕭特默格自殺十月壬寅天清節大赦齊高麗夏遣使來賀上如興中府齊使使來告母喪十一月癸亥以武良謨為齊弔祭使癸未薩

里罕請取餉外十三州從之部族節度使特古斯捕斬  
伊都及其諸子函其首來獻十二月庚子薩里罕克金  
州上至自興中府

十一年正月丁巳朔齊高麗夏遣使來賀丁卯薩里罕  
敗吳玠于饒風關戊辰取洋州甲戌入興元府二月己  
亥元帥府言承詔賑軍士臣恐有司錢幣將不繼請自  
元帥以下有祿者出錢助給之詔曰官有府庫而取於  
臣下此何理耶其悉從官給八月甲申黃龍府置錢帛



司戊子趙樛誣告其父昏德公謀反樛及其壻劉文彥  
伏誅戊戌詔曰比以軍旅未定嘗命帥府自擇人授官  
今並從朝廷選注十月丙申天清節齊高麗夏遣使來  
賀十一月丙寅賑伊蘭路宗弼克和尚原十二月癸未  
賑海蘭路


十二年正月辛亥朔齊高麗夏遣使來賀甲子初改定  
制度詔中外丙寅如東京二月丁酉薩里罕敗宋吳玠  
軍于同鎮四月至自東京六月甲午以阿里布為元帥

右都監十月庚寅天清節齊高麗夏遣使來賀

十三年春正月丙午朔日有食之己巳上崩于明德宮  
年六十一庚午安班貝勒即皇帝位于柩前三月庚辰  
上尊謚曰文烈皇帝廟號太宗乙酉葬和陵皇統四年  
改號恭陵五年增上尊謚曰體元應運世德昭功哲惠  
仁聖文烈皇帝貞元三年十一月戊申改葬于大房山  
仍號恭陵

贊曰天輔草創未遑禮樂之事太宗以舍音宗幹知國

政以宗翰宗望總戎事既滅遼舉宋即議禮制度治歷  
明時續以武功述以文事經國規模至是始定在位十  
三年宮室苑籞無所增益末聽大臣計傳位熙宗使太  
祖世嗣不失正緒可謂行其所甚難矣



金史卷三

# 欽定四庫全書

史部

金史卷

五四

詳校官國子監祭酒<sub>臣</sub>覺羅喜喜

主事<sub>臣</sub>汪彥博覆勘

總校官舉人<sub>臣</sub>章維樞

校對官編修<sub>臣</sub>章宗瀛

謄錄監生<sub>臣</sub>吳映熙

欽定四庫全書

金史卷四

元中書右丞相總裁托克托等修

本紀第四

熙宗

熙宗弘基續武莊靖孝成皇帝諱亶本諱哈喇太祖孫景宣皇帝子母富察氏天輔三年己亥歲生天會八年安班貝勒景既薨太宗意久未次十年左副元帥宗翰

左副元帥宗輔左監軍完顏希尹入朝與宗幹議曰安班貝勒虛位已久今若不早定恐授非其人哈喇先帝嫡孫當立相與請於太宗者再三廼從之四月庚午詔曰爾為太祖之嫡孫故命爾為安班貝勒爾其無自謂冲幼狎于童戲惟敬厥德安班貝勒者昔太宗嘗居是官及登大位以命弟杲杲薨帝定議為儲嗣故以是命焉十三年正月己巳太宗崩庚午即皇帝位甲戌詔中外詔公私禁酒癸酉遣使告哀於齊高麗夏及報即位

仍詔齊自今稱臣勿稱子二月乙巳追謚太祖后唐古氏曰聖穆皇后費摩氏曰光懿皇后追冊太祖妃布薩氏曰德妃烏庫哩氏曰賢妃辛酉改葬太祖於和陵三月己卯齊高麗遣使來弔祭庚辰謚大行皇帝曰文烈廟號太宗乙酉葬太宗于和陵甲午以古倫右貝勒都元帥宗翰為太保領三省事封晉國王戊戌詔諸國使賜宴不舉樂四月戊午齊高麗遣使賀即位丙寅昏德公趙佶薨遣使致祭及賻贈是月甘露降于熊岳縣五



月甲申左副元帥宗輔薨九月壬申追尊皇考豐王為景宣皇帝廟號徽宗皇妣富察氏為惠昭皇后戊寅尊太祖后赫舍哩氏太宗后唐古氏皆為太皇太后詔中外乙酉改葬徽宗及惠昭后於興陵十一月以尚書令宋國王宗磐為太師乙亥初頒歷己卯以元帥左監軍完顏希尹為尚書左丞相兼侍中太子少保高慶裔為左丞平陽尹蕭慶為右丞己丑建天開殿于約羅十二月癸亥始定齊高麗夏朝賀賜宴朝辭儀以京西鹿園

賜農民十四年正月己巳朔上朝太皇太后于兩宮齊  
高麗夏遣使來賀癸酉頒歷于高麗丁丑太皇太后赫  
舍哩氏崩乙酉萬壽節齊高麗夏遣使來賀上本七月  
七日生以同皇考忌日改用正月十七日二月癸卯上  
尊謚曰欽獻皇后葬睿陵三月壬午以太保宗翰太師  
宗磐太傅宗幹並領三省事丁酉高麗遣使來弔八月  
丙辰追尊九代祖以下曰皇帝皇后定始祖景祖世祖  
太祖太宗廟皆不祧癸亥詔齊國與本朝軍民訴訟相

關者文移署年止用天會十月甲寅以吳激為高麗王  
生日使蕭仲恭為齊劉豫回謝并生日正旦使十五年  
正月癸亥朔上朝太皇太后于明德宮齊高麗夏遣使  
來賀初用大明歷己卯萬壽節齊高麗夏遣使來賀六  
月庚戌尚書左丞高慶裔轉運使劉思有罪伏誅七月  
辛巳太保領三省事晉國王宗翰薨丙戌夜京師地震  
封皇叔宗雋宗固叔祖暉皆為王丁亥汰兵興濫爵十  
月乙卯以元帥左監軍達蘭為左副元帥封魯國王宗

弼右副元帥封瀋王知樞密院事兼侍中時立愛致仕  
十一月丙午廢齊國降封劉豫為蜀王詔中外置行臺  
尚書省于汴十二月戊辰劉豫上表謝封爵癸未詔改  
明年為天眷元年大赦命韓昉耶律紹文等編修國史  
以鼎為尚書左丞同中書門下平章事徙蜀王劉豫臨  
潢府

天眷元年正月戊子朔上朝明德宮高麗夏遣使來賀  
頒女直小字封大司空昱為王甲辰萬壽節高麗夏遣

使來賀二月壬戌上如約羅春水乙丑幸天開殿己巳  
詔罷拉林水混同江護邏地與民耕牧三月庚寅以禁  
苑隙地分給百姓戊申以韓昉為翰林學士四月丁卯  
命少府監盧彥倫營建宮室止從儉素壬午朝享于天  
元殿立費摩氏為貴妃五月己亥詔以經義詞賦兩科  
取士六月戊午至自天開殿秋七月辛卯左副元帥  
達蘭東京留守宗雋來朝丁酉按春河水溢壞廬舍民  
多溺死壬寅左丞相希尹罷八月甲寅朔頒行官制癸

亥回鵬遣使朝貢己卯以河南地與宋以右司侍郎張  
通古等使江南以京師為上京府曰會寧舊上京為北  
京九月甲申朔以爽為會寧牧封鄧王乙未詔百官誥  
命女直契丹漢人各用本字渤海同漢人丁酉改燕京  
樞密院為行臺尚書省戊戌上朝明德宮甲辰以爽為  
平章政事己酉省燕中西三京平州東西等路州縣辛  
亥權行臺左丞相張孝純致仕十月甲寅朔以御前管  
勾契丹文字李德因為參知政事丙寅封叔宗強為紀

王宗敏邢王太宗子呼拉布等十三人為王已巳始禁親王以下佩刀入宮辛未定封國制癸酉以東京留守宗雋為尚書左丞相兼侍中封陳王十一月丙辰以康宗以上畫像工畢奠獻於乾元殿十二月癸亥新宮成甲戌高麗遣使入貢丁丑立貴妃費摩氏為皇后

二年正月壬午朔高麗夏遣使來賀戊戌萬壽節高麗夏遣使來賀以左丞相宗雋為太保領三省事進封充國王興中尹完顏希尹復為尚書左丞相兼侍中二月

乙未上如天開殿三月丙辰命百官詳定儀制四月甲戌百官朝參初用朝服己卯宋遣使謝河南地五月戊子太白晝見乙巳上至自天開殿六月己酉朔初御冠服辛亥烏舍謀反伏誅己未上從容謂侍臣曰朕每閱貞觀政要見其君臣議論大可規法翰林學士韓昉對曰皆由太宗溫顏訪問房杜輩竭忠盡誠其書雖簡足以為法上曰太宗同一代賢君明皇何如昉曰唐自太宗以來惟明皇憲宗可數明皇所謂有始而無終者初



以艱危得位用姚崇宋璟惟正是行故能成開元之治  
末年怠於萬幾委政李林甫奸諛是用以致天寶之亂  
苟能慎終如始則貞觀之風不難追矣上稱善又曰周  
成王何如主昉對曰古之賢君上曰成王雖賢亦周公  
輔佐之力後世疑周公殺其兄以朕觀之為社稷大計  
亦不當非也七月辛巳宋國王宗磐充國王宗雋謀反  
伏誅丙戌以右副元帥宗弼為都元帥進封越國王丁  
亥以誅宗磐等詔中外己丑以左副元帥達蘭為行臺

左丞相杜充為行臺右丞相蕭寶耶律暉行臺平章政  
事甲午咸州詳袞沂王暉坐與宗磐謀反伏誅卒及以  
太傅領三省事宗幹為太師領三省如故進封梁宋國  
王八月辛亥行臺左丞相達蘭翼王呼蘭及呼勤希圖  
達蘭子幹泰額特布謀反伏誅丁丑太白晝見九月戊  
寅朔降封太宗諸子大司空昱罷丙申初居新宮立太  
祖原廟於慶元宮壬寅宋遣王倫等乞歸父喪及母韋  
氏等拘倫不遣以溫都思忠諸路廉問十月癸酉夏國

使來告喪十二月豫國公昱薨

三年正月丁丑朔高麗夏遣使來賀癸巳萬壽節高麗  
夏遣使來賀以都元帥宗弼領行臺尚書省事四月乙  
巳朔溫都思忠廉問諸路得廉吏杜遵晦以下百二十  
四人各進一階貪吏張軫以下二十一人皆罷之癸丑  
蜀國公完顏尼楚赫薨丁卯上如燕京五月丙子詔元  
帥府復取河南陝西地己卯詔冊李仁孝為夏國王命  
都元帥宗弼以兵自黎陽趨汴右監軍薩里罕出河中

趨陝西是月河南平六月陝西平上次涼陘大旱使蕭  
彥讓田穀決西京囚秋七月癸卯朔日有食之乙卯宗  
弼遣使奏河南陝西捷丁卯詔文武官五品以上致仕  
給俸祿之半職三品者仍給僉人八月辛巳詔撫諭陝  
西五路壬午初定公主郡縣主及駙馬官品九月壬寅  
朔宗弼來朝戊申上至燕京己酉親饗太祖廟庚申宗  
弼還軍中夏國遣使謝賻贈癸亥殺左丞相完顏希尹  
右丞相蕭慶及希尹子昭武大將軍巴達符寶郎滿達

戊辰夏國遣使謝封冊十一月癸丑以孔子四十九代  
孫璫襲封衍聖公癸亥以都點檢蕭仲恭為尚書右丞  
前西京留守昂為平章政事甲子行臺尚書右丞相杜  
充堯十二月乙亥都元帥宗弼上言宋將岳飛張俊韓  
世忠率衆渡江詔命擊之丁丑地震己亥以元帥左監  
軍阿里布為左副元帥右監軍薩里罕為右副元帥  
皇統元年正月辛丑朔高麗夏遣使來賀庚戌羣臣上  
尊號曰崇天體道欽明文武聖德皇帝初御袞冕癸丑

謝太廟大赦改元丁巳萬壽節高麗夏遣使來賀巳未  
初定命婦封號夏國請置榷場許之巳巳封平章政事  
昂為漆水郡王二月戊寅詔諸致仕官職俱至三品者  
俸祿人力各給其半宗弼克廬州乙酉改封海濱王耶  
律延禧為豫王昏德公趙信為天水郡王重昏侯趙桓  
為天水郡公戊午上親祭孔子廟北面再拜退謂侍臣  
曰朕幼年遊佚不知志學歲月逾邁深以為悔孔子雖  
無位其道可尊使萬世景仰大允為善不可不勉自是

頗讀尚書論語及五代遼史諸書或以夜繼焉己未上宴羣臣於瑤池殿適宗弼遣使奏捷侍臣多進詩稱賀帝覽之曰太平之世當尚文物自古致治皆由是也四月丙子以濟南尹韓昉參知政事辛巳宗弼請伐江南從之五月己酉太師領三省事梁宋國王宗幹薨庚戌上親臨日官奏戌亥不宜哭泣上曰君臣之義骨肉之親豈可避之遂哭之慟命輟朝七日六月甲戌詔都元帥宗弼與宰執同入奏事庚寅行臺平章政事耶律暉

致仕壬辰有司請舉樂上以宗幹新喪不允甲午紀王  
宗強薨上親臨輟朝如宗幹喪七月癸卯以景宣皇帝  
忌辰命尚食徹肉丙午以宗弼為尚書左丞相兼侍中  
都元帥領行臺如故己酉宗弼還軍中辛亥參知政事  
耶律讓罷九月戊申上至自燕京朝太皇太后于明德  
宮詔賜鰥寡孤獨不能自存者人絹二匹絮三斤是秋  
蝗都元帥宗弼伐宋渡淮以書讓宋宋復書乞罷兵宗  
弼以便宜畫淮為界十一月己酉高麗國賀受尊號稽



古殿火十二月癸巳夏國賀受尊號天水郡公趙桓乞本品俸詔賙濟之左丞勗進先朝實錄三卷上焚香立受之

二年正月乙未朔高麗夏遣使來賀己亥上獵於拉林河乙巳命伐高麗丁未上至自拉林河辛亥萬壽節高麗夏遣使來賀壬子衍聖公孔璫薨子拯襲二月丁卯上如天開殿甲戌賑熙河路戊子皇子濟安生辛卯宋使曹勛來許歲幣銀絹二十五萬兩匹畫淮為界世世

子孫永守誓言改封蜀王劉豫為曹王壬辰以皇子生  
赦中外三月辛丑還自天開殿大雪丙午以宗弼為太  
傅丙辰遣左宣徽使劉筈以袞冕圭冊冊宋康王為帝  
歸宋帝母韋氏及故妻邢氏天水郡王并妻鄭氏喪子  
江南戊午立子濟安為皇太子丙寅以臣宋告中外庚  
午五雲樓重明等殿成五月癸巳朔不視朝上自去年  
荒于酒與近臣飲或繼以夜宰相入諫輒飲以酒曰知  
卿等意今既飲矣明日當戒因復飲乙卯賜宋誓詔辛

酉宴羣臣於五雲樓皆盡醉而罷七月甲午回鶻遣使  
來貢北京廣寧府蝗丁酉賜宗弼金券八月丁卯詔歸  
朱弁張邵洪皓於宋辛未復太宗子呼嚕為王賑陝西  
九月壬辰詔給天水郡王子姪婿天水郡公子俸給十  
一月甲寅平章政事漆水郡王昂薨追封鄴王十二月  
乙丑高麗王遣使謝封冊庚午宋遣使謝歸三喪及母  
韋氏壬申上獵于和約爾瑪勒路癸未還宮甲申皇太  
子濟安薨

三年正月己丑朔以皇太子喪不御正殿羣臣詣便殿稱賀宋高麗夏使詣皇極殿遙賀乙巳萬壽節如正旦儀三月辛卯以尚書左丞勗為平章政事殿前都點檢宗憲為尚書左丞丁酉太皇太后唐古氏崩己酉封子道濟為魏王五月丁巳朔京兆進瑞麥癸亥上致祭太皇太后甲申初立太廟社稷六月己酉初置驍毅軍七月丙寅上致祭太皇太后庚辰太原路進獬豸并瑞麥八月辛卯詔給天水郡王孫及天水郡公婿俸祿丙申

老人星見乙巳謚太皇太后曰欽仁皇后戊申葬恭陵  
十二月癸未朔日有食之

四年正月癸丑朔宋高麗夏遣使來賀甲寅詔以去年  
宋幣賜始祖以下宗室己未以宋使王倫為平州轉運  
使既受命復辭罪其反覆誅之乙丑陝西進嘉禾十有  
二莖莖皆七穗己巳萬壽節宋高麗夏遣使來賀乙亥  
上祭欽仁皇后哭盡哀二月癸未上如東京丙申次本  
巴河春水丁酉回鶻使來賀以鈕祜祿罕努報之五月

辛亥朔次薰風殿六月辛巳朔日有食之七月庚午建  
原廟於東京八月癸未殺魏王道濟九月乙酉上如東  
京壬子畋于沙河射虎獲之十月乙卯遣使祭遼主陵  
辛酉詔薰風殿二十里內及巡幸所過五里內竝復一  
歲癸酉行臺左丞相張孝純薨十一月壬辰立借貸飢  
民酬賞格甲辰以河朔諸郡地震詔復百姓一年其壓  
死無人收葬者官為斂藏之陝西蒲解汝蔡等處因歲  
饑流民典顧為奴婢者官給絹贖為良放還其鄉十一

月己酉上獵于海島十二月甲午至東京

五年正月丁未朔宋高麗夏遣使來賀癸亥萬壽節宋  
高麗夏遣使來賀二月乙未次濟州春水三月戊辰次  
天開殿五月戊午初用御製小字壬申以平章政事勗  
諫上為止酒仍布告廷臣六月乙亥朔日有食之八月  
戊戌發天開殿九月庚申至自東京十月辛卯增謚太  
祖閏月戊寅大名府進牛生麟壬辰懷州進嘉禾十二  
月戊申增謚始祖以下十帝及太宗徽宗丁巳赦

六年正月辛未朔宋高麗夏遣使來賀壬申封太祖諸  
孫為王乙亥畋于美稜甲申還京師丁亥萬壽節宋高  
麗夏遣使來賀庚寅以邊地賜夏國壬辰如春水帝從  
禽導騎悞入大澤中帝馬陷因步出亦不罪導者乙未  
封威赫為王二月丙寅右丞相韓企先薨三月壬申以  
阿里布為行臺右丞相四月庚子朔上至自春水以同  
判大宗正事宗固為太保右丞相兼中書令戊午行臺  
右丞相阿里布薨五月壬申高麗王楷薨辛卯以左宣



徽使劉筈為行臺右丞相六月乙巳殺宇文虛中及高士談乙丑遣使弔祭高麗并起復嗣王暉九月戊辰朔以許王破汴睿宗平陝西鄭王克遼及羅索尼楚赫皆有大功竝為立碑戊寅曹王劉豫薨是歲遣鈕祜祿罕努招耶律達實被害

七年正月乙丑朔宋高麗夏遣使來賀辛巳萬壽節宋高麗夏遣使來賀癸未以西京鹿園為民田丁丑太白經天三月戊寅高麗遣使謝弔祭起復四月戊午宴便

殿上醉酒殺戶部尚書宗禮六月丁酉殺橫海軍節度使田  
穀左司郎中奚穀翰林待制邢具瞻及王植高鳳廷王傲趙  
益興龔彞鑑等七月己巳太白經天曲赦畿內九月太保右  
丞相宗固薨以都元帥宗弼為太師領三省事都元帥行臺  
尚書省事如故平章政事勗為左丞相兼侍中都點檢宗賢  
為右丞相兼中書令行臺右丞相劉箬右丞蕭仲恭為平章  
政事李德固為尚書右丞秘書監蕭肄為叅知政事十月壬  
子平章行臺尚書省事奚寶晃十一月癸酉以工部侍郎布

薩達幹為御史大夫乙亥兵部尚書秉德進三角羊己卯詔減常膳羊豕五之二癸未以尚書左丞宗憲為行臺平章政事同判大宗正事亮為尚書左丞十二月戊午叅知政事韓昉罷兵部尚書秉德為叅知政事

八年正月庚申朔宋高麗夏遣使來賀丙子萬壽節宋高麗夏遣使來賀二月壬子以克呼克巴噶等為橫賜高麗夏國使甲寅以大理卿宗安等為高麗王覲封冊使乙卯上如天開殿四月戊子朔日有食之辛丑遣叅

知政事秉德等廉察官吏庚戌至自天開殿甲寅遼史成六月乙卯平章政事蕭仲恭為行臺左丞相左丞亮為平章政事都點檢唐古辯為尚書左丞高麗王遣使謝封冊七月乙亥御史大夫布薩達幹罷以侍衛親軍都指揮使阿魯岱為御史大夫戊寅以尚書左丞唐古辯奉職不謹杖之八月戊戌宗弼進太祖實錄上焚香立受之庚子以尚書左丞相勗領行臺尚書省事右丞相宗

賢為太保尚書左丞相丙午以行臺左丞相蕭仲恭  
為尚書右丞相閏月庚申宰臣以西林多鹿請上獵  
上恐害稼不允丙寅太廟成九月丙申尚書左丞唐古  
辯罷以左宣徽使稟為尚書左丞十月辛酉太師領三  
省事都元帥越國王宗弼薨十一月壬辰太白經天乙  
未左丞相宗賢左丞稟等言州郡長吏當竝用本國人  
上曰四海之內皆朕臣子若分別待之豈能致一謗不  
云乎疑人勿使使人勿疑自今本國及諸色人量才通

用之辛丑以尚書左丞相宗賢為左副元帥平章政事  
亮為尚書左丞相兼侍中叅知政事秉德為平章政事  
庚戌左副元帥宗賢復為太保左丞相左副元帥如故  
十二月乙卯以右丞相蕭仲恭為太傅領三省事左丞  
相亮為尚書右丞相乙亥以左丞相宗賢為太師領三  
省事兼都元都

九月正月甲申朔宋高麗夏遣使來賀戊戌太師領三  
省事都元帥宗賢罷領行臺尚書省事鼎為太師領三

省事同判大宗正事充為尚書左丞相右丞相亮兼都元帥庚子萬壽節宋高麗夏遣使來賀壬寅左丞相充堯丙午以右丞相亮為左丞相判大宗正事宗本為尚書右丞相左副元帥宗敏為都元帥南京留守宗賢為左副元帥兼西京留守己酉宗賢復為太保領三省事二月甲寅會寧牧唐古辭復為尚書左丞尚書左丞稟為行臺平章政事三月癸未朔日有食之辛丑以司空宗本為尚書右丞相兼中書令左丞相亮為太保領三

省事四月壬申夜大雨風雷電震壞寢殿鴟尾有火入  
上寢燒幃幔帝趨別殿避之丁丑有龍鬬于利州榆林  
河水上大風壞民居官舍瓦木人畜皆飄颺十數里死  
傷者數百人五月戊子以四月壬申丁丑天變肆赦命  
翰林學士張鈞草詔參知政事蕭肄摛其語以為誹謗  
上怒殺鈞是日曲赦上京囚庚寅出太保領三省事亮  
領行臺尚書省事戊申武庫署令耶律巴錦妄稱上言  
宿直將軍蕭榮與胙王元為黨誅之六月己未以都元



帥宗敏為太保領三省事兼左副元帥左丞相宗賢兼都元帥八月庚申以劉筈為司空行臺右丞相如故宰臣議徙遼陽渤海之民於燕南從之侍從高壽星等當遷訴於后后以白上上怒議者杖平章政事秉德殺左司郎中薩哈九月丙申以領行臺尚書省事亮復為平章政事戊戌以右丞相宗本為太保領三省事左副元帥宗敏領行臺尚書省事平章政事秉德為尚書左丞相兼中書令司空劉筈為平章政事庚子以御史大夫

宗甫為參知政事十月乙丑殺北京留守胥王元及右  
安武軍節度使扎拉左衛將軍塔斯大赦癸酉以翰林  
學士京為御史大夫十一月癸未殺皇后費摩氏召  
王妃薩滿入宮戊子殺故鄧王子阿蘭達蘭癸巳上  
于和羅溫圖瑛遣使殺妃烏庫哩氏及瓜爾佳氏張  
十二月己酉朔上至自獵所丙辰殺妃費摩氏於寢  
而平章政事亮因羣臣震恐與黨駙馬唐古辯寢殿  
達爾大興國護衛十人長呼圖額呼楚克等謀為亂

已以呼圖額呼楚克當內直命省令史李老僧語興國  
夜二鼓興國竊符矯詔開宮門召辯等亮懷刀與真止  
夫塔斯隨辯入室宮門守者以辯駙馬不疑內之及叩  
門衛士覺抽刀劫之莫敢動呼圖額呼楚克至帝前  
求榻上常所置佩刀不知已為興國易置其處呼圖額  
呼楚克遂進弑帝亮復前手刃之血濺滿其面與衣帝  
崩時年三十一左丞相秉德等遂奉亮坐羅拜呼萬歲  
立以為帝降帝為東昏王葬于皇后費摩氏墓中貞元

三年改葬于大房山蓼香甸諸王同兆域大定初追謚武靈皇帝廟號閔宗陵曰思陵別立廟十九年升祔于太廟增謚弘基纘武莊靖孝成皇帝二十七年改廟號熙宗二十八年以思陵狹小改葬於峨眉谷仍號思陵詔中外

贊曰熙宗之時四方無事敬禮宗室大臣委以國政其繼體守文之治有足觀者末年酗酒妄殺人懷危懼所謂前有讒而不見後有賊而不知馴致其禍非一朝一

夕故也

金史卷四

欽定四庫全書

金史卷五

元中書右丞相總裁托克托等修

本紀第五

海陵

廢帝海陵庶人亮字元功本諱都古嚕訥遼王宗幹次子也母大氏天輔六年壬寅歲生天眷三年年十八以宗室子為奉國上將軍赴梁王宗弼軍前任使以為行

軍萬戶遷驃騎上將軍皇統四年加龍虎衛上將軍為  
中京留守遷光祿大夫為人僇急多猜忌殘忍任數初  
熙宗以太祖嫡孫嗣位亮意以為宗幹太祖長子而已  
亦太祖孫遂懷覬覦在中京專務立威以厭伏小人明  
安蕭裕傾險敢決亮結納之每與論天下事裕揣知其  
意因勸海陵舉大事語在裕傳七年五月召為同判大  
宗正事加特進十一月拜尚書右丞務攬特權柄用其  
腹心為省臺要職引蕭裕為兵部侍郎一日因召對語

及太祖創業艱難亮因嗚咽流涕熙宗以為忠八年六月拜平章政事十一月拜右丞相九年正月兼都元帥熙宗使小底大興國賜亮生日悼后亦附賜禮物熙宗不悅杖興國百追其賜物海陵由此不自安三月拜太保領三省事益邀求人譽引用勢望子孫結其驩心四月學士張鈞草詔忤旨死熙宗問誰使為之左丞相宗賢對曰太保實然熙宗不悅遂出為領行臺尚書省事過中京與蕭裕定約而去至良鄉台還海陵莫測所以



召還之意大恐既至復為平章政事由是益危迫熙宗  
嘗以事杖左丞唐古辯及右丞相秉德辯乃與大理卿  
烏達謀廢立而烏達先以此謀告海陵他日海陵與辯  
語及廢立事曰若舉大事誰可立者辯曰昨王常勝乎  
問其次曰鄧王子阿蘭亮曰阿蘭屬疎安得立辯曰公  
豈有意邪海陵曰果不得已捨我其誰於是旦夕相與  
密謀護衛將軍塔斯疑之以告悼后曰辯等公餘每竊  
竊聚語竊疑之后以告熙宗熙宗怒召辯謂曰爾與亮

謀何事將如我何杖之亮因此忌常勝阿蘭且惡塔斯  
因河南兵士孫進自稱皇弟按察大王而熙宗之弟止  
有常勝扎拉海陵乘此搆常勝扎拉阿蘭達蘭熙宗使  
塔斯鞠之無狀海陵曰塔斯鞠不以實遂俱殺之護衛  
十人長布薩呼圖舊受宗幹恩圖克坦額呼楚克海陵  
姻家大興國給事寢殿時時乘夜從主者取符鑰歸家  
以為常興國嘗以李老僧屬海陵得為尚書省令史故  
使老僧結興國為內應而興國亦以被杖怨熙宗遂與

亮約十二月丁巳呼圖額呼楚克內直是夜興國取符  
鑰啟門納海陵秉德辯烏達圖克坦貞李老僧等入至  
寢殿弑熙宗秉德等未有所屬呼圖曰始者儀立平章  
今復何疑乃奉海陵坐皆拜稱萬歲詐以熙宗欲議立  
后召大臣遂殺曹國王宗敏左丞相宗賢是日以秉德  
為左丞相兼侍中左副元帥辯為右丞相兼中書令烏  
達為平章政事呼圖為左副點檢額呼楚克為右副點  
檢貞為左衛將軍興國為廣寧尹於是自太師領三省

事勗以下二十人進爵增職各有差己未大赦改皇統九年為天德元年參知政事蕭肄除名鎮南統軍博濟為尚書左丞賜左丞相秉德右丞相辯平章政事烏達廣寧尹興國點檢呼圖額呼楚克左衛將軍貞尚書省令史老僧辯父刑部尚書阿里等錢絹馬牛羊有差甲子誓太祖廟召秉德辯烏達呼圖額呼楚克興國六人賜誓券丙寅以燕京路都轉運使劉麟為參知政事癸酉太傅領三省事蕭仲恭尚書右丞稟罷以行臺尚書

左丞溫都思忠為右丞乙亥追諡皇考太師憲古弘道  
文昭武烈章孝睿明皇帝廟號德宗名其故居曰興聖  
宮宋高麗夏賀正旦使中道遣還

二年正月辛巳以同知中京留守事蕭裕為秘書監癸  
巳尊嫡母圖克坦氏母大氏皆為皇太后圖克坦氏宮  
曰永壽大氏宮曰永寧乙巳以勵官守務農時慎刑罰  
揚側陋恤窮民節財用審才實七事詔中外遣侍衛親  
軍步軍都指揮使完顏思恭等以廢立事報諭宋高麗

夏國以左丞相兼左副元帥兼德領行臺尚書省事二月戊申朔封子元壽為崇王庚戌降前帝為東昏王給天水郡公孫女二人月俸甲子以兵部尚書完顏元宜等充賀宋生日使戊辰羣臣上尊號曰法天膺運睿武宣文大明聖孝皇帝詔中外永壽永寧兩太后父祖贈官有差以右丞相唐古辨為左丞相平章政事烏達為右丞相三月丙戌宋高麗遣使賀即位以弟究為司徒兼都元帥詔以天水郡王玉帶歸宋四月戊午殺太傅

領三省事宗本尚書左丞相唐古辯判太宗正府事宗  
美遣使殺領行臺尚書省事兼德東京留守宗懿北京  
留守卞及太宗子孫七十餘人周宋國王宗翰子孫三  
十餘人諸宗室五十餘人辛酉以尚書省譚史蕭玉為  
禮部尚書秘書監蕭裕為尚書左丞司徒充領三省事  
封王都元帥如故右丞相烏達為司徒左丞相兼侍中  
平章政事劉筈為尚書右丞相兼中書令左丞宗義右  
丞溫都思忠為平章政事參知政事劉麟為尚書右丞

殿前左副點檢布薩呼圖為殿前都點檢五月戊子以平章行臺尚書省事右副元帥大臬為行臺尚書右丞相元帥如故壬辰以左副元帥薩里罕為行臺尚書左丞相元帥如故同判大宗正事宗安為御史大夫六月丙午朔高麗遣使賀即位甲子太廟初設四神門及四隅朶兒七月己丑司空左丞相兼侍中烏達罷以平章政事溫都思忠為左丞相尚書左丞蕭裕為平章政事右丞劉麟為左丞侍衛親軍步軍都指揮使完顏思恭



為右丞參知政事張浩丁憂起復如故戊戌夏國遣使  
賀即位及受尊號八月戊申以司徒充為太尉領三省  
事都元帥如故以禮部尚書蕭裕為參知政事九月甲  
午立惠妃圖克坦氏為后十月癸卯太師領三省事勗  
致仕辛未殺太皇太妃蕭氏及其子任王威赫使使殺  
行臺左丞相左副元帥薩里罕于汴并殺平章政事宗  
義前工部尚書穆里延御史大夫宗安皆夷其族以魏  
王威泰孫呼爾察好修飾亦族之十一月癸未尚書左

丞相劉苦罷以會寧牧圖克坦恭為平章政事尚書左  
丞劉麟右丞完顏思恭罷以參知政事張浩為尚書右  
丞乙酉以行臺尚書左丞張通古為尚書左丞丙戌白  
虹貫日丁亥以太后旨稱令旨戊子以十二事戒約官  
吏乙丑命庶官許求次室二人百姓亦許置妾十二月  
癸卯朔詔去羣臣所上尊號丙午初定襲封衍聖公俸  
格命外官去所屬百里外者不許參謁百里內者往還  
不得過三日癸丑立太祖射碑于赫舍哩部中上及皇

后致奠于碑下甲寅野人來獻異香却之乙卯有司奏  
慶雲見上曰朕何德以當此自今瑞應毋得上聞若有  
災異當以諭朕使自警焉己未罷行臺尚書省改都元  
帥府為樞密院詔改定繼絕法以右副元帥大臬為尚  
書右丞相兼中書令參知行臺尚書省事張中孚為參  
知政事都元帥究為樞密使太尉領三省事如故元帥  
左監軍昂為樞密副使刑部尚書趙資福為御史大夫  
三年正月癸酉朔宋高麗夏遣使來賀乙亥參知政事

蕭玉丁憂起復如故癸未立春觀擊土牛丁亥初造燈  
山于宮中戊子生辰宋高麗夏遣使來賀甲午初置國  
子監謂御史大夫趙資福曰汝等多徇私情未聞有所  
彈劾朕甚不取自今百官有不法者必當舉劾無憚權  
貴乙未上出獵宰相以下辭於近郊上駐馬戒之曰朕  
不惜高爵厚祿以任汝等比聞事多留滯豈汝等苟圖  
自安不以民事自念耶自今朕將察其勤惰以為賞罰  
其各勉之丁酉白虹貫日二月丁巳還宮三月庚寅以

翰林學士劉長言等為宋生曰使壬辰詔廣燕城建宮  
室己亥謂侍臣曰昨太子生日皇后獻朕一物大是珍  
異卿試觀之即出諸絳囊中乃田家稼穡圖后意太子  
生深宮之中不知民間稼穡之艱難故以為獻朕甚賢  
之四月丙午詔遷都燕京辛酉有司圖上燕城宮室制  
度營建陰陽五姓所宜海陵曰國家吉凶在德不在地  
使桀紂居之雖卜善地何益使堯舜居之何用卜為丙  
寅罷歲貢鷹隼沂州男子吳真犯法當死有司以其母

老疾無侍為請命官與養濟著為令閏月辛未朔命尚書右丞張浩調選燕京仍諭浩無私徇丙子命大官常膳惟進魚肉舊貢鵝鴨等悉罷之丁丑罷皇統間苑中所養禽獸歸德軍節度使阿里布以撒官舍材木構私第賜死戊戌詔朝官稱疾不治事者尚書省令監察御史與太醫同診視無實者坐之五月壬子以戒敕宰相以下官詔中外戊辰宰臣請益嬪御廣嗣續上命圖克坦貞語宰臣前所誅黨人諸婦人中多朕中表親欲納

之宮中平章政事蕭裕不可上不從遂納宗本子蘇爾圖宗固子呼喇勒和碩台秉德弟嘉哩等妻宮中六月丙子殺太府監完顏富魯宋遣使祈請山陵不許九月庚戌賜燕京役夫帛人一匹以東京路兵馬都總管府判官蕭子敏為高麗生日使修起居注蕭朋格為夏國生日使十月己巳殺蘭子山明安蕭拱以右副點檢富珠哩阿哈等為宋正旦使十一月癸亥詔罷世襲萬戶官前後賜姓人各復本姓十二月戊辰杖壽寧縣主蘇

尼癸酉獵于近郊乙酉還宮是歲子崇王元壽薨

四年正月丁酉朔宋高麗夏遣使來賀羣臣請立皇太子從之戊戌初定東宮官屬立捕盜賞格癸卯太白經天壬子生辰宋高麗夏遣使來賀癸亥朝謁世祖太祖太宗德宗陵甲子還宮二月丁卯立子光英為皇太子庚午詔中外甲戌如燕京昭義軍節度使蕭仲宣家奴告其主怨謗上曰仲宣之姪達年鄂博近以誹謗誅故敢妄愬命殺告者達年鄂博者蕭拱也戊子次泰州三



月丙申朔以刑部尚書田秀穎等為宋生日使四月丙寅朔有司請今歲河南北選人並赴中京銓注從之壬辰上自泰州如涼陘五月丁酉獵于伊拉齊山甲寅賜獵士人一羊乙卯次臨潢府丁巳太白經天六月甲子朔駐綿山戊寅權超泰部明安納延伏誅七月癸卯命崇義軍節度使烏達之妻唐古定格殺其夫而納之八月癸亥朔獵于托紐山甲戌以侍御史博羅鞠事不實杖之丙子次于達幹九月甲午次中京丙午尚書右丞

相大臬罷殺太府少監劉景以都水使者完顏滿丕為  
高麗生日使吏部郎中蕭中立為夏國生日使十月壬  
戌朔使使奉遷太廟神主御史大夫趙資福罷甲申以  
太子詹事張用直等為賀宋正旦使殺太祖長公主烏  
嚕杖罷其夫平章政事圖克坦恭封其侍婢呼達為國  
夫人恭兄定格初尚烏嚕定格死恭強納焉而不相能  
又與侍婢呼達不協呼達得幸于后遂譖于上故見殺  
而并罷恭十一月戊戌以咸平尹李德固為平章政事

辛丑買珠于烏爾古德呼勒部及扶餘路禁私相貿易  
仍調兩路民採珠一年戊申以前平章政事圖克坦恭  
為司徒十二月甲子斬妾人敲僊于中京市辛未以汴  
京路都轉運使左瀛等為賀宋正旦使庚寅太尉領三  
省事樞密使充薨

貞元元年正月辛卯朔上不視朝詔有司受宋高麗夏  
回紇貢獻丙午生辰宋高麗夏遣使來賀以中京留守  
高楨為御史大夫二月庚申上自中京如燕京三月辛

亥上至燕京初備法駕甲寅選良家子百三十餘人充  
後官乙卯以遷都詔中外改元貞元改燕京為中都府  
曰大興汴京為南京中京為北京丙辰以司徒圖克坦  
恭為太保領三省事平章政事蕭裕為右丞相兼中書  
令右丞張浩左丞張通古為平章政事參知政事張中  
孚為左丞蕭玉為右丞平章政事李德固為司空左宣  
徽使劉萼為參知政事樞密副使昂為樞密使工部尚  
書布薩思恭為樞密副使四月辛酉以右宣徽使赫舍

哩薩哈連等為宋賀生日使辛未特封唐古定格為貴妃戊寅皇太后大氏崩五月辛卯殺弟西京留守博恰西京兵馬完顏穆喇幹編修官圖福努通進伯特坐與博恰善并殺之乙卯以京城隙地賜朝官及衛士六月乙丑以安國軍節度使耶律恕為參知政事七月戊子朔元賜朝官京城隙地徵錢有差八月壬戌司空李德固薨禁中都路捕射麋兔戊寅賜營建宮室工匠及役夫帛九月丁亥朔以翰林待制摩囉歡為夏國生日使

吏部郎中幹克珊為高麗生日使十月丁巳獵于良鄉  
封料石岡神為靈應王初海陵嘗過此祠持杯玳禱曰  
使吾有天命當得吉卜投之吉又禱曰果如所卜他日  
當有報否則毀爾祠宇投之又吉故封之戊午還宮壬  
戌有司言太后園陵未畢合停冬享及祫祭從之丙子  
命內外官聞大功以上喪止給當日假若父母喪聽給  
假三日著為令十一月丙戌朔定州獻嘉禾詔自今不  
得復進己丑瑤池殿成丙申以戶部尚書蔡松年等為

賀宋正旦使戊戌左丞相諾延溫都思忠致仕庚戌以  
樞密使昂為左丞相樞密副使布薩思恭為樞密使十  
二月太白經天戊午特賜貴妃唐古定格家奴孫梅進  
士及第壬戌以簽書樞密院事納蘇為樞密副使辛未  
封所納皇叔曹國王宗敏妃阿蘭為昭妃丙子貴妃唐  
古定格坐與舊奴姦賜死閏月乙酉朔殺護衛特默格  
癸巳定社稷制度太白經天癸卯以太保領三省事圖  
克坦恭為太師領三省事故如命西京路統軍達蘭西

北路招討蕭懷忠臨潢府總管馬和尚烏爾古德呼勒  
司招討舍音等北巡

二年正月甲寅朔上不豫不視朝賜宋高麗夏使就館  
燕庚申太白經天尚書右丞相蕭裕與前真定尹蕭豐  
嘉努前御史中丞蕭珠展博州同知約索等謀反伏誅  
詔中外已巳生辰宋高麗夏遣使來賀二月甲申朔以  
平章政事張浩為尚書右丞相兼中書令甲午以尚書  
右丞蕭玉為平章政事前河南路統軍使張暉為尚書



右丞西北路招討使蕭海呼為樞密副使三月戊辰夏遣使賀遷都丙戌幸大興府及都轉運使司遣薦含桃于衍慶宮五月癸丑朔日有食之避正殿勅百官勿治事己未詔自今每月上七日不奏刑名尚食進饌不進肉丁卯始置交鈔庫設使副員丁丑太原尹圖克坦額呼楚克伏誅命其子珠蘇拉乘傳焚其骨擲水中七月庚申初設鹽鈔香茶文引印造庫使副丙子參知政事耶律恕罷八月丙午以左丞相昂去衣杖其弟婦命杖

之戊申以御史大夫高楨為司空御史大夫如故九月  
己未常武殿擊鞠令百姓縱觀辛酉以吏部尚書蕭隋  
為參知政事癸亥獵于近郊丁卯次順州太師領三省  
事圖克坦恭薨是夜還宮乙亥復獵近郊十月庚辰朔  
殺廣寧尹韓王亨庚寅還宮庚子以左丞相致仕溫都  
思忠起為太傅領三省事以刑部侍郎白彥恭等為賀  
宋正旦使十一月戊辰上命諸從姊妹皆分屬諸妃出  
入禁中與為淫亂卧內徧設地衣裸逐為戲是月初置

惠民司高麗遣使謝賜生日十二月乙酉以太傅溫都思忠為太師領三省事如故平章政事張通古為司徒平章政事如故

三年正月己酉朔宋高麗夏遣使來賀辛酉以判東京留守大臬為太傅領三省事甲子生辰宋高麗夏遣使來賀二月壬午以左丞相昂為太尉樞密使右丞相張浩為左丞相兼侍中樞密使布薩思恭為右丞相兼中書令尚書左丞張中孚罷右丞張暉為平章政事參知

政事劉萼為左丞參知政事蕭隲為右丞吏部尚書蔡松年為參知政事三月壬子以左丞相張浩平章政事張暉每見僧法寶必坐其下失大臣體各杖二十僧法寶妄自尊大杖二百乙卯命以大房山雲峰寺為山陵建行宮其麓庚午以左司郎中李通為賀宋生日使夏四月丁丑朔昏霧四塞曰無光凡十有七日五月丁未朔日有食之癸丑南京大內火乙卯命判大宗正事京等如上京奉還太祖太宗梓宮丙寅如大房山營山陵

六月丙戌登寶昌門觀角抵百姓縱觀乙未命右丞相  
布薩思恭太宗正丞哈布爾如上京奉遷山陵及迎永  
壽宮皇太后七月癸丑太白晝見辛酉如大房山杖提  
舉營造官吏部尚書耶律安禮等乙亥還宮八月壬午  
如大房山甲申啟土賜役夫人絹一疋是日還宮甲午  
遣平章政事蕭玉迎祭祖宗梓宮於廣寧乙未增置教  
坊人數庚子杖左宣徽使敬嗣暉同知宣徽事烏居仁  
及尚食官九月戊申平章政事張暉迎祭梓宮于宗州

乙卯上謂宰臣及左司官曰朝廷之事尤在慎密昨授張中孚趙慶襲官除書未到先已知之皆汝等泄之也敢復爾者殺無赦己未如大房山庚申還宮丙寅以殿前都點檢納哈塔椿年為參知政事丁卯上迎梓宮及皇太后于沙流河命左右持杖二束跪太后前曰亮不孝久失溫清願痛笞之太后掖起之曰凡民有子克家猶愛之況我有子如此叱持杖者退庚午獵親射麋以薦梓宮壬申至自沙流河十月丙子皇太后至中都居

壽康宮戊寅權奉安太廟神主于延聖寺致奠梓宮于東郊舉哀己卯梓宮至中都以大安殿為丕承殿安置壬午命省部諸司便服治事不奏死刑一月辛卯告于丕承殿乙未如敢宮冊謚永寧皇太后曰慈憲皇后丁酉大房山行宮成名曰磐寧戊戌還宮己亥以翰林學士承旨耶律歸一等為賀宋正旦使十一月乙巳朔梓宮發丕承殿戊申山陵禮成甲寅詔內外大小職官覃遷一重貞元四年租稅並與放免軍士久於屯戍不經

替換者人賜絹三疋銀三兩羣臣稱賀丙辰燕百官於  
泰和殿丁卯奉安神主于太廟戊辰羣臣稱賀辛未獵  
于近郊十二月己丑還宮薦冰乙未上朝太后于壽康  
宮己亥太傅領三省事大臬薨親臨哭之命有司廢務  
及禁樂三日

正隆元年正月癸卯朔宋高麗夏遣使來賀己酉羣臣  
奉上尊號曰聖文神武皇帝上自九月廢朝常數月不  
出有急奏召左右司郎中省于卧内庚戌始視朝戊午



生辰宋高麗夏遣使來賀乙丑觀角抵戲罷中書門下  
省以太師領三省事溫都思忠為尚書令太尉樞院使  
昂為太師右丞相布薩思恭為太尉樞密使左丞劉萼  
右丞蕭蹟罷參知政事蔡松年為尚書右丞樞密副使  
蕭懷忠罷吏部尚書耶律安禮為樞密副使平章政事  
蕭玉為右丞相平章政事張暉罷不置平章政事官二  
月癸酉朔改元正隆大赦庚辰御宣華門觀迎佛賜諸  
寺僧絹五百疋絲五十段銀五百兩辛巳改定內外諸

司印記乙未司徒張通古致仕庚子謁山陵辛丑還都  
三月壬寅朔始定職事官朝參等格仍罷兵衛庚申以  
左宣徽使敬嗣暉等為賀宋生日使四月太尉樞密使  
布薩思恭以父憂起復如故五月辛亥修容安氏閤女  
御為妖所憑舞譟宮中命殺之是月頒行正隆官制六  
月庚辰天水郡公趙桓薨丙戌以尚書右丞蔡松年為  
左丞樞密副使耶律安禮為右丞駙馬都尉烏庫哩當  
堪為樞密副使七月己酉命太保昂如上京奉遷始祖

以下梓宮八月丁丑如大房山行視山陵十月乙酉葬  
始祖以下十帝于大房山丁酉還宮閏月己亥朔山陵  
禮成羣臣稱賀甲辰回鶻使使揚珠烏埒古來貢庚寅  
杖右丞相蕭玉左丞蔡松年右丞耶律安禮御史中丞  
馬諷等十一月己巳朔以右司郎中梁鉞等為賀宋正  
旦使癸巳禁二月八日迎佛

二年正月戊辰朔宋高麗夏遣使來賀庚辰太白晝見  
癸未生辰宋高麗夏遣使來賀庚寅以工部侍郎韓錫

同知宣徽院事錫不謝杖百二十奪所授官二月辛丑  
初定太廟時享牲牢禮儀癸卯改定親王以下封爵等  
第命置局追取存亡誥身存者二品以上死者一品參  
酌削降公私文書但有王爵字者皆立限毀抹雖墳墓  
碑志並發而毀之三月丙寅朔高麗遣使賀受尊號四  
月戊戌追降景宣皇帝為遼王以簽書宣徽院事張詰  
為橫賜高麗使宣直將軍溫都幹罕為橫賜夏國使六  
月乙未參知政事納哈塔椿年薨以禮部尚書耶律守

素等為賀宋生日使八月癸卯置登聞院甲寅罷上京  
留守司九月乙丑以宿直將軍布薩烏呼赫為夏國生  
日使戊子罷護駕軍置龍翔虎步軍罷尚書省文資令  
史出為外官是秋中都山東河東蝗十月壬寅命會寧  
府毀舊宮殿諸大族第宅及儲慶寺仍夷其址而耕種  
之丁未禁賣古器入他境乙卯初鑄銅錢十二月辛未  
以侍衛親軍副指揮使高珠巴克等為賀宋正旦使十  
二月己亥以侍衛親軍都指揮使赫舍哩良弼為參知

政事

三年正月壬戌朔宋高麗夏遣使來賀丙寅子舒蘇鄂  
博死殺太醫副使謝友正及其乳母等丁丑生辰宋高  
麗夏遣使來賀己卯杖右諫議大夫楊伯雄二月壬辰  
朔都城及京兆初置錢監甲午遣使檢視隨路金銀銅  
鐵冶三月辛酉朔司天奏日食候之不見命自今遇日  
食面奏不須頒告辛己以兵部尚書蕭恭等為賀宋生  
日使四月丙辰樞密副使烏庫哩當堪罷以北京留守

張暉為樞密副使六月壬辰蝗入京師七月庚申封子  
廣陽為滕王甲申以右丞相蕭玉為司徒尚書左丞蔡  
松年為右丞相右丞耶律安禮為左丞參知政事赫舍  
哩良弼為右丞左宣徽使敬嗣暉戶部尚書李通為參  
知政事九月己未太白經天甲子滕王廣陽薨庚午以  
宿直將軍阿勒巴為夏國生日使丁丑以教坊提點高  
存福為高麗生日使辛巳遷中都屯軍一明安於南京  
遣吏部尚書李惇等分地安置十月戊戌詔尚書省凡

事理不當者許詣登聞檢院投狀院類奏覽訖付御史  
臺理問十一月辛酉以工部尚書蘇保衡等為賀宋正  
旦使癸亥詔有司勤政安民癸未尚書左丞耶律安禮  
罷參知政事李通以憂制起復如故詔左丞相張浩參  
知政事敬嗣暉營建南京宮室十二月乙卯以樞密副  
使張暉為尚書左丞歸德尹致仕高昭和碩起為樞密  
副使

四年正月丙辰朔宋高麗夏遣使來賀上朝太后于壽



康宮丁巳御史大夫高楨薨庚申更定私相越境法竝  
論死辛酉罷鳳翔唐鄧穎蔡鞏洮膠西諸權場置場泗  
州辛未生辰宋高麗夏遣使來賀二月己丑以左宣徽  
使許霖為御史大夫丁未修中都城造戰船于通州詔  
諭宰臣以伐宋事調諸路明安穆昆軍年二十以上五  
十以下者皆籍之雖親老丁多亦不許留侍三月丙辰  
朔遣兵部尚書蕭恭經畫夏國邊界遣使分詣諸道總  
管府督造兵器四月辛丑命增山東路泉水畢括兩營

兵士廩給庚戌詔諸路舊貯軍器竝致于中都時方建  
宮室于南京又中都與四方所造軍器材用皆賦於民  
箭翎一尺至千錢村落間徃徃推牛以供筋革至於烏  
鵲狗鼠無不被害辛亥尚書左丞張暉御史大夫許霖  
罷以大興尹圖克坦貞為樞密副使以秘書監王可道  
等為賀宋生日使八月詔諸路調馬以戶口為差計五  
十六萬餘疋富室有至六十疋者仍令戶自養飼以俟  
己卯尚書右丞相蔡松年薨九月以翰林待制完顏達

紀為高麗生日使宿直將軍爪爾佳達蘭為夏國生日  
使十月乙亥獵近郊觀造船通州賜尚書右丞赫舍哩  
良弼樞密副使圖克坦貞佩刀入宮十一月甲辰以翰  
林侍講學士施宜生等為賀宋正旦使十二月乙卯宋  
遣使告母韋氏哀甲子太白晝見乙丑以左副點檢大  
懷忠等為宋弔祭使乙亥太醫使祈宰上疏諫伐宋殺  
之

五年正月庚辰朔宋高麗夏遣使來賀乙未生辰宋高

麗夏遣使來賀二月壬子宋遣使獻母后遺留物丁卯  
太白晝見辛未河東陝西地震鎮戎德順軍大風壞廬  
舍人多壓死甲戌遣引進使高植刑部郎中海古勒分  
道監視所獲盜賊竝凌遲處死或鋸灼去皮截手足戒  
屯戍千戶穆昆等後有獲者竝處死總管府官亦決罰  
三月辛巳東海縣民張旺徐元等反遣都水監徐文步  
軍指揮使張弘信同知大興尹事李惟忠宿直將軍蕭  
阿古率舟師九百浮海討之命之曰朕意不在一邑將

試舟師耳庚子以司徒判大宗正事蕭玉為御史大夫  
司徒如故尚書右丞赫舍哩良弼為左丞橫海軍節度  
使致仕劉長言起為右丞四月庚戌昭妃富蔡阿里庫  
有罪賜死甲寅宿州防禦使耶律翼使宋失體杖二百  
除名甲戌太白晝見六月徐文等破賊張旺徐元東海  
平七月辛巳詔東海縣徐元張旺誣誤者並釋之壬午  
以張弘信被命討賊稱疾逗遛萊州與妓樂飲燕杖之  
二百癸卯遣使發諸路漢軍八月丙午朔日有食之辛

亥命權貨務并印造鈔引庫起赴南京己巳樞密副使  
圖克坦貞罷以太子少保圖克坦永年為樞密副使辛  
未謁山陵見穫者問其豐耗以衣賜之九月己卯還宮  
十月庚午遣護衛完顏布琳等二十四人督捕山東河  
東河北中都盜賊籍諸路水手得三萬人十一月乙酉  
以濟南尹布薩烏哲等為賀宋正旦使尚書右丞劉長  
言罷命親軍司以所掌付大興府置左右驍騎都副指  
揮使隸點檢司步軍都指揮使隸宣徽院十二月癸丑

禁中都河北山東河南河東京兆軍民網捕禽獸及畜養雕隼者戊辰禁朝官飲酒犯者死三國人使燕飲者罪

六年正月甲戌朔宋高麗夏遣使來賀丁丑判太宗正圖克坦貞益都尹京安武軍節度使夾金吾衛上將軍阿蘇飲酒以貞近屬杖七十餘皆杖百壬午上將如南京以司徒御史大夫蕭玉為大興尹司徒如故樞密副使圖克坦永年罷都點檢赫舍哩志寧為樞密副使已

丑生辰宋高麗夏遣使來賀癸丑命參知政事李通諭  
宋使徐度等曰朕昔從梁王軍樂南京風土常欲巡幸  
今營繕將畢功期以二月末先往河南帝王巡守自古  
有之以淮右多隙地欲校獵其間從兵不踰萬人況朕  
祖宗陵廟在此安能久于彼乎汝等歸告汝主令有司  
宣諭朕意使淮南之民無懷疑懼庚子詔自中都至河  
南府所過州縣調從獵騎士二千辛丑殺富察阿古岱  
女徹辰徹辰慶宜公主出幼鞠宮中上屢欲納之太后



不可至是以罪殺之二月乙巳杖衛王襄之妃及左宣  
徽使許霖申寅以參知政事李通為尚書右丞己未禁  
扈從縱獵擾民庚申徵諸道水手運戰船癸亥發中都  
丙寅次安肅州三月己卯改河南北邙山為太平山稱  
舊名者以違制論丁亥將至獲嘉有男子上書言事斬  
之所言莫得聞癸巳次河南府因出獵幸汝州溫湯視  
行宮地自中都至河南所過麥皆為空復禁扈從母輒  
離次及游賞飲酒犯者罪皆死而莫有從者詔內地諸

明安赴山後牧馬俟秋並發第究之妻烏雅氏有罪賜死烏雅氏之弟南京兵馬副都指揮使寶訥亦以罪誅四月丁未詔百官先赴南京治事尚書省樞密院大宗正府勸農司太府少府皆從行吏戶兵刑部四方館都水監大理司官各留一員以簽書樞密院事高景山等為賀宋生日使戊申詔汝州百五十里內州縣量遣簡賈赴溫湯置市詔有司移問宋人蔡頴壽諸州對境創置堡戍者庚戌發河南府契丹本布自山馳下伏道左

自陳破東海賊有功為李惟忠所抑立命斬之丁卯次  
溫湯誠扈從母輒過汝水上獵奔鹿突之墮馬嘔血數  
日遣使徵諸道兵五月庚辰太師尚書令諾延溫都思  
忠薨契丹諸部反遣右將軍蕭圖喇等討之六月癸卯  
命樞密使布薩思恭西京留守蕭懷忠將兵一萬討契  
丹諸部上自汝州如南京壬戌次南京近郊左丞相張  
浩率百官迎謁是夜太風壞承天門鷗尾癸亥上備法  
駕入于南京七月丁亥以左丞相張浩為太傅尚書令

司徒大興尹蕭玉為尚書左丞相吏部尚書白彥恭為  
樞密副使樞密副使赫舍哩志寧為開封尹安武軍節  
度使圖克坦貞為御史大夫己丑賜從駕從行軍及千  
戶穆昆錢帛大括天下羸馬殺亡遼耶律氏宋趙氏子  
男凡百三十餘人八月壬寅單州賊杜奎據城叛遣都  
點檢耶律湛右驍騎副都指揮使大磐討之以樞密副  
使白彥恭為北面兵馬都統開封尹赫舍哩志寧副之  
中都留守完顏古雲為西北面兵馬都統西北路招討

使唐古布古德副之討契丹癸丑以諫伐宋弑皇太后  
圖克坦氏于寧德宮命即宮中焚之棄其骨水中并殺  
其侍婢等十餘人癸亥殺右將軍蕭圖喇護衛十人長  
鄂勒博族樞密使布薩思恭北京留守蕭蹟西京留守  
蕭懷忠杖尚書令張浩左丞相蕭玉以太常博士張崇  
為高麗生曰使蕭誼忠為夏國生曰使甲子封所幸太  
后侍婢高福娘為鄖國夫人九月庚午朔以太保判大  
宗正事昂為樞密使太保如故戊子殺前壽州刺史摩

囉歡庚寅大名府賊王九據城叛衆至數萬所至盜賊蜂起大者連城邑小者保山澤或以十數騎張旗幟而行官軍莫敢近上又惡聞盜賊事言者輒罪之上自將三十二總管兵伐宋進自壽春以太保樞密使昂為左領軍大都督尚書右丞李通副之尚書左丞赫舍哩良弼為右領軍大都督判太宗正烏雅富埒瑄副之御史大夫圖克坦貞為左監軍同判太宗正事圖克坦永年為右監軍左宣徽使許霖為左都監河南尹富察鄂倫

為右都監皆從工部尚書蘇保衡為浙東道水軍都統  
制益都尹正嘉副之浮海趨臨安太原尹劉夢為漢南  
道行營兵馬都統制濟南尹布薩烏哲副之進自蔡州  
河中尹圖克坦喀齊喀為西蜀道行營兵馬都統制平  
陽尹張中彥副之由鳳翔取散關駐軍俟命武勝武平  
武捷三軍為前鋒圖克坦貞別將兵二萬入淮陰甲午  
上發南京皇后及太子光英居守尚書令張浩左丞相  
蕭玉參知政事敬嗣暉留治省事丙申太白晝見將士

自中軍亡歸者相屬於道哈斯罕明安福壽東京穆昆  
金住等始授甲于大名即舉部亡歸從者衆至萬餘皆  
公言於路曰我輩今往東京立新天子矣十月乙巳陰  
迷失道二鼓始達營所丙午慶雲見東京留守曹國公  
烏祿即位于遼陽改元大定大赦數海陵過惡弑皇太  
后圖克坦氏殺太宗及宗翰宗弼子孫宗本諸王毀上  
京宮室殺遼豫王宋天水郡王郡公子孫等數十事丁  
未大軍渡淮將至廬州獲白鹿以為武王白魚之兆漢



南道劉萼取通化軍蔣州信陽軍圖克坦貞敗宋王權  
于盱眙進取揚州前鋒軍至段寨宋戍兵皆遁去敗宋  
兵于蔚子橋敗宋兵于巢縣斬二百級至和州王權夜  
以兵千餘來襲射却之翼日雨宋人焚積聚宵遁詰旦  
追之宋人逆戰明安韓崇軍却遂失利溫都敖拉奔北  
武捷軍副總管阿薩爾率明安穆昆力戰却之王權退  
保南岸癸亥上次和州阿薩爾等行賞有差西蜀道圖  
克坦喀齊喀駐散關宋人攻秦州臘家城德順州克之

浙東道蘇保衡與宋人戰于海道敗績副統制正嘉死  
之十一月庚午左司郎中鄂博庫等聞赦入白東京即  
位改元事上拊髀歎曰我本欲滅宋後改元大定豈非  
天命乎出其書示之即預志改元事也以勸農使完顏  
元宜為浙西道兵馬都統制刑部尚書郭安國副之上  
駐軍江北遣武平總管阿林先渡江至南岬失利上還  
和州遂進兵揚州甲午會舟師于瓜洲渡期以明日渡  
江乙未浙西兵馬都統制完顏元宜等軍反帝遇弑崩


年四十海陵在位十餘年每飾情貌以御臣下却尚食進鵝以示儉及游獵頻次不時需索一鵝一鷄民間或用數萬售之有以一牛易一鷄者或以敝衾覆衣以示近臣或服補綴令記注官見之或取軍士陳米飯與尚食同進先食軍士飯幾盡或見民車陷泥澤令衛士下挽俟車出然後行與近臣燕語輒引昔古賢君以自況顯責大臣使進直言使張仲軻輩為諫官而析宰竟以直諫死比昵羣小官賞無度左右有曠僚者人或以名

呼之即授以顯階常置黃金衲褥間有喜之者令自取之而淫嬖不擇骨肉刑殺不問有罪至營南京宮殿運一木之費至二十萬牽一車之力至五百人宮殿之飾徧傳黃金而後間以五采金屑飛空如落雪一殿之費以億萬計成而復毀務極華麗其南征造戰艦江上毀民廬舍以為材焚死人膏以為油殫民力如馬牛費財用如土苴空國以圖人國遂至於敗都督府以其樞置之南京班荆館大定二年降封為海陵郡王諡曰煬二

月世宗使實達爾羅索與南京官遷其柩於寧德宮四月  
葬于大房山鹿門谷諸王兆域中二十年熙宗既祔廟  
有司奏曰煬王之罪未正準晉趙王倫廢惠帝自立惠  
帝反正誅倫廢為庶人煬帝罪惡過於倫不當有王封  
亦不當在諸王塋域乃詔降為海陵庶人改葬于山陵  
西南四十里

贊曰海陵智足以拒諫言足以飾非欲為君則弑其君  
欲伐國則弑其母欲奪人之妻則使之殺其夫三綱絕

矣何暇他論至於屠滅宗族翦刈忠良婦姑姊妹盡入  
嬪御方以三十二總管之兵圖一天下卒之戾氣感召  
身由惡終使天下後世稱無道主以海陵為首可不戒  
哉可不戒哉



金史卷五